

東
華
續
錄

東華續錄

光緒一百五十三

臣朱壽朋敬編

臣汪錫增恭校

三月己酉召福州將軍增祺來京○庚戌以華金壽爲內閣學士○辛亥祭先農壇遣載勛恭代行禮○以甘肅補用副將喻東高憚弛營務革職該管官當夏總兵王金安交部議處○壬子許應騷奏閩省上年自春徂夏陰雨連綿入秋風潮爲患隴鹽堤坎衝壞場中積鹽浸鎔轉運船隻均被漂沒懇將帶完稅銀量予展限下戶部議奏○甲寅以河東河道總督任道鎔續摺錯誤交部議處○諭軍機大臣等奏會議山東黃河工程一摺山東黃河經李鴻章會同任道鎔張汝梅周歷查勘詳擬辦法具奏當交軍機大臣大學士六部九卿翰詹科道會同議覆茲據世鐸等奏稱該大學士等所擬大治辦法與救急治標辦法均尙切實請照議辦理并飭戶部分別籌款等語山東河患甚急非大加修治無以瀦沈澱災現議治標即大治之始事自應預籌的款以資開辦著戶部按照所議應需各款依期籌撥並將籌撥的款先行具奏河道爲民命所關毋任指攤各省輾轉推延致誤要需至所請簡派大員駐工督辦之處著俟戶部籌定款項再行請旨○乙卯開復前北洋副將葉祖珪革職處分並賞加提督銜賞補用副將薩鎮冰

總兵銜○陶模奏甘省銅昂工貴請暫緩鼓鑄制錢報聞○欽奉 慈禧端佑康頤昭豫莊誠壽恭欽

崇熙皇太后懿旨戶部奏遵議八旗兵丁甲米自漕糧改折以來皆以二成放給本色其餘八成折銀開

放近來糧價日昂銀價日賤該兵丁等以銀易米虧折實多每致不敷所用現在倉儲未裕未能速復舊

制惟當此青黃不接之時各旗兵丁困苦情形實堪憫念著加恩每名賞給本色米一石即於四月內全

行開放毋庸按照甲米扣除以示體恤俟折漕各省規復本色後再行酌議動放該部知道○許應騷奏

臣准總理衙門咨准英使照會閩省辦理交涉案件通商局員耽延不結請將該局裁撤咨行酌核辦

理等因查閩省自同治五年創立通商局委科糧道兼辦其時洋務尙簡故未特設專員歷任督臣舊例

相沿於各屬交涉事件向係行局轉飭致文移往返未免稽延臣抵任後凡遇重要事件皆逕飭辦理以

期迅速惟查該局爲洋務總匯不僅經理通商督糧道未必皆能熟悉洋務且糧儲是其專責並分巡甯

福二府政務殷繁勢亦難於兼顧現擬將該局更名洋務局另委熟悉洋務之員辦理所有重要事件仍

由臣逕行飭辦以省周折而專責成下所司知之○內辰前兵部尙書孫毓汶卒卹廕如例○諭本日吏

部奏吉林長春府知府謝汝欽請仍俟到本任後再行計俸一摺業經降旨依議惟此項事件該部係於

上年十二月間奉到現在遲至兩月有餘始行陳奏殊屬延玩嗣後各衙門遇有應辦應議及覆奏事件

務當迅速辦理不得似此泄沓將此通諭知之○戊午諭軍機大臣等翰林院侍讀黃思永奏豫防永定河患敬陳管見並請特召道員辦理各摺片所陳治河各節是否可行著裕祿體察情形酌核辦理直隸候補道衛杰是否熟習河務並著查明具奏原摺片著鈔給閱看將此諭令知之○總理各國事務衙門等奏光緒二十五年二月十二日准軍機處鈔交湖南巡撫俞廉三奏請嚴禁私運錫砂一片奉 硃批著總理各國事務衙門會同督辦礦務大臣查核辦理欽此查原奏內稱錫砂一種外洋稱爲安的摩尼湘省各屬所在多有採煉可作炸藥帽藥並入鐵鑄造機器具用甚廣其價較鉛爲昂爲外洋所必需爲中國所制稔論礦務者首以此爲可興之利前於益陽等處覓獲錫砂試鑄銷路有漢口亨達利洋行訂銷出錫五成以上之砂三萬墩每墩先繳價銀三十兩俟其售出仍照行規各分紅成因於漢口設立轉運局過磅交易後於各處廣爲搜求續有所獲因招粵商大成公司來湘就近提煉成錫分別運銷查各境產錫之所則有貴州之銅仁四川之秀山銅仁近辦封閉秀山所產去年曾販運過界經辰州分局查獲照本省商探章程給價入官未令越境蓋以此物爲火器所用無異硝磺未可聽其所之漫無限制且私販爭售價值必減有妨利權倘本省商探之區從而影射稽查尤難更恐鄰近所產尚不止此應請飭下礦務鐵路總局定立嚴禁私販條規分行各省一體查禁其黔蜀各省嗣後有運錫過湘者卽由湘

照商探章程收買不得繞越等語臣等伏查錫砂一項既足供製造機器之用如果提煉得法則銷路必廣獲利自豐湘省出產既多自應酌定採運章程以便分銷各路惟此物既可煉作炸藥等項即與硝磺無異若任聽私販爭售不特有礙利權且恐別滋流弊應請准如該撫所請嚴行查禁至各省出產錫砂處所亟應設法採運以闢利源若如原奏所稱黔蜀各省嗣後運銷過湘即由湘照商採章程收買不得繞越是同為產錫之地湘省既可設局以轉運黔蜀各省獨不能越境以行銷殊不足以昭公允且別省運銷到湘腳價所費尤鉅若一律給本省官價恐鄰商賠累過多實於礦務有礙至該省所定商採章程未據咨報有案應由臣等咨取查核如果切實可行應令產錫省分仿照辦理嗣後不論何處出產即歸該管省分徵稅既經官為轉運或由商照章運過驗稅領有稅單沿途經過關卡查無私販夾帶以多報少情弊准予放行以杜弊端而暢銷路得旨如所議行○己未以直隸毅軍辦理海防期滿予總統官四川提督宋慶交部優敘○恩澤等奏江省電報係屬南北幹綫計自茂興站起歷省城恩爾根以迄愛琿黑河屯止未嘗分枝旁及呼蘭呼倫貝爾等處邇來中俄會修鐵路東西穿貫該兩城皆所必經而時值興工呼蘭尤稱繁要當經派員履勘據稟茂興站距蘭最近綫道僅四百餘里應由該站幹綫之上添掛枝綫東達呼蘭即在該站設一報房呼蘭設一分局創始既易局用亦輕等情奴才等因一面電商督

辦電報事宜大理寺少卿盛宣懷請其代購纜料一面飭由江關右路統領定縣就近覓購電桿現在電桿將次購足纜料亦由盛宣懷飭運營口三四月內即可接運到江伏查光緒十二年江省創設電報之初原議官局辦理其時桿木由江自採料則北洋代籌然莫非出自公款也茲准盛宣懷電擬纜機鉤碗諸物價銀五千餘兩電桿一項雖未據定縣詳報價值尚不甚昂貴但以料件數萬斤之重行水路數千里之運費可知此外運木需工通盤合籌大約必需銀一萬數千兩明知時事艱難何敢動言請款特以邊事利鈍所繫不得不勉為議決議者或謂呼蘭為商務會萃之地將來商報必旺成本尚可踴躍斯言固係實情亦難預必奴才等擬於本省司庫存款內暫行動用容俟開局以後體察情形如可分年繳還自是正辦否則遇有別項餘款再為奏明隨時彌補俾臣先其所急速觀厥成呼倫貝爾地方為後日鐵車所必經亦應及早籌及意俟呼蘭辦畢再為相勢續圖接辦現須添設之呼蘭分局一處及興站報房一處月需員司報生勇役薪餉等項銀二百二十兩擬再按照本省各官局章程仍在盤捐項下開支以期經久得旨如所請行○辛酉諭前據軍機大臣等會奏遵旨議覆大學士李鴻章等奏查勘黃河工程請飭部分別籌款當經諭令戶部按照所議應需各款依期分別籌撥並將籌定的款先行具奏茲據戶部奏稱此次黃河工程按照辦法次第原非一時並舉應需款項自應分次籌措現在於各省

存儲的款項下指撥銀四十萬兩專爲加撥修防購辦物料之用限於四月前解到復於各省存儲及山東節餉項下指撥銀六十萬兩以爲擇要修培堤埝之用限於六月伏汛以前解到其疏通海口一項先須購地遷民方能漸次施工既經該部在關稅項下先撥的款銀十萬兩以爲購地遷民之用一俟辦有端緒卽行續撥銀一百九十萬兩斷不至貽誤要需等語山東黃河關繫數百萬生民朝廷軫念民依特派大臣周歷詳查後令廷臣公同會議所籌治標辦法卽大治之本要在得人以理事事認真始不至虛糜鉅款此次籌辦工程均在山東境內毓麟以巡撫兼管河工責無旁貸卽著該撫悉心綜核督飭上中下游總辦道員各將責成切實經理毋得濫用一人虛糜一物該省河工積弊已深朝廷不惜費鉅工難取陋修治所撥款項絲毫均關國帑如有不肖官吏仍蹈從前因循粉飾任意偷減之弊希圖中飽蒙混開支一經查出卽當立予嚴懲加等治罪不得以尋常參處了事總期工堅料實河患日紓以濟沈災而拯昏墊至戶部所撥各項俱係有著的款卽著電知各省該管督撫務當仰體朝廷慎重河防之意迅飭該管各員將指撥之款儘數依限解工毋得輾轉推延並不准絲毫拖欠倘限期已逾解不足數卽由山東巡撫查明報部由戶部從嚴奏參餘依議○壬戌諭奎俊奏開缺道員稟請回籍終養據情代奏等語四川川東道任錫汾前因辦理案件貽誤地方諭令開缺送部引見乃竟敢藉詞引退實屬有意取巧任

錫汾藩卽行革職該部知道○諭軍機大臣等前因京城制錢短少曾經諭令沿江沿海及近畿省分於應解部庫款項搭解一成制錢原期逐漸流通便民利用因思雲貴每年解京銅鉛本備鼓鑄之用若令改鑄制錢分批運解既省京局鼓鑄之煩於運腳費用當亦無甚出入著崧蕃王毓藻唐炯體察情形或全行鑄錢解京或分作數成以若干成鼓鑄制錢分起運解以資挹注務卽迅速籌議奏明辦理○癸亥調軍修綱爲雲南臨元鎮總兵劉萬勝爲甘肅西甯鎮總兵○甲子諭御史余誠格奏特旨擢用人員請分別班次選補等語著吏部妥議具奏○諭吳殿元著開缺另候簡用○調王連三爲直隸大名鎮總兵以張士元爲廣東高州鎮總兵○乙丑准河南商城縣士民捐建故山東巡撫張曜祠○丁卯諭本日召見之廣東高州鎮總兵張士元著仍留於武衛軍歸榮祿差遣委用○以龍殿揚爲山東曹州鎮總兵○以田玉廣爲甘肅寧夏鎮總兵仍留武衛軍交榮祿差委○諭前據兵部右侍郎通政使司李端遇呈進安徽婺源縣已故生員汪紱所著各書當交南書房翰林閣看茲據閣臣呈覽汪紱學問淵博經術湛深所著易經詮義易經如話書經詮義禮記章句禮記或問六禮或問樂經律呂通統樂經事啟春秋集傳四書詮義孝經章句或問山海經存策略戊戌談兵醫林纂要各書並遺書十二種著卽交懋勤殿以備觀覽○諭前據翰林院侍讀學士陳秉和奏山東巡撫張汝梅衰頹昏愒復詐貪婪臚列各款糾參當經

諭令溥良確查具奏茲據查明覆奏開缺山東巡撫張汝梅在任年餘於賑務河工雖未能辦理盡善尙無廢弛欺飾各情弊惟所委差缺之袁保純等係該撫子姪親戚應否迴避未據聲明並將崔廷桂之孫崔澍濫列保案楊史道口焚燒稽料未經派員往驗均屬疏忽其信任崔廷桂尤爲用人不當該撫既被參劾物望未孚惟尙無職私劣跡著降二級另候簡用總兵崔廷桂雖無納賄情據惟任性妄爲不知檢束以致物議沸騰著卽行革職候選道判崔澍恃有舊交投効河工候補道丁達意派令隨同當差稟請奏保均屬不知違嫌著交部議處降補都司杜榮福係河工曾經獲咎人員著撤去河營差使袁保純黃兆茂凌漢袁世敦各員才具是否稱職總兵田恩來能否勝任均著毓賢隨時察看餘著照議辦理該部知道○諭溥良奏遵查張上達等參款據實覆陳一摺前據翰林院侍讀學士陳秉和濟徵等奏參已革山東濟東泰武臨道張上達候補道黃瓊降補道判關錫祺降補同知葉潤含各劣跡當經諭令溥良據實查辦茲據該侍郎查明覆奏張上達被參前在山東惡棍藉勢賄賂公行各節雖無實據惟前因聲名甚劣經前任巡撫李秉衡奏參革職衆論皆稱不屈著仍卽革職黃瓊前在山東聲名本屬平常辦理賑款册又不據實開報著卽行革職關錫祺前在臨清州知州任內辦理關稅未能核實子弟親戚冒列河工優獎前經李秉衡奏參予以降補處分尙屬平允著仍以道判降補葉潤含前被參以同知降補在部

候選後並未來東於賑務既無干涉其拜認師生各節亦未能指實著免其置議仍俟選缺到省後由該督撫隨時察看餘著照所議辦理該部知道○壬申命河南巡撫裕長回任○調增祺爲盛京將軍以慶祺爲新設通州都統○癸酉裕祿奏光緒二十五年三月十一日准軍機大臣字寄三月初九日奉 上諭翰林院侍讀黃思永奏預防永定河患敬陳管見並請特召道員辦理各摺片所陳治河各節是否切實可否著裕祿體察情形酌核辦理直隸候補道衛杰是否熟悉河務並著查明具奏原摺片著鈔給閱看將此諭令知之欽此詳閱原奏所稱永定河上游數百里重疊疊嶂勢若建瓴中無停勒下益橫急與其山空峽地岸設防不如於山間夾溝築壩使有節制層層遏抑以緩其馳驟之勢嗣以本山亂石疊成攔以木橋或以柳條編成斷式使其缺能過水急流緩瀉下游自無暴漲之患不用條石工料亦省地取流瀾仿照四川離堆成式使水道曲折紆緩不至橫溢直趨係爲減緩上游水勢以紆下游河患起見伏查永定河夾泥帶沙渾流湍急久爲近畿大患自康熙乾隆年間以來屢經修治迄無一勞永逸之方黃思永所論辦法果能行之有效未始非補偏救弊之一策惟查永定河志內載乾隆八年大學士鄂爾泰等會議直隸總督高斌奏稱永定河上游疊乾河由西甯縣之石閘村入山所經宣化境內之黑龍灣懷來境內之和合堡宛平境內之沿河口三處皆兩山夾峙全河之水東趨會此更無別路若由此三處山

口就近取石堆壘玲瓏水壩以勒其洶暴之勢則下游之患可以稍減再和合堡尤爲衆河匯流之處
先由此處建壩約估銀二千餘兩應請一併在營田工本項下動支報銷俟試行有效再將黑龍灣
兩處酌估增修俾層層截頓以殺其勢等語查永定河攙泥夾沙水勢洶湧若於和合堡等處建築均用
石壩果能截緩水勢措置得宜自可減奔騰直注之患但恐大小之水下流層層攔築上游不無阻遏
泥之虞應令該督等酌度情形詳慎辦理俟試行有效再將黑龍灣沿河口兩處酌估增修又查乾隆三
十六年高晉奏曰修等會勘永定河事宜覆奏稱和合口原係兩山夾峙一水中通渾流至此本天然收
束雖有玲瓏石壩意在稍緩其勢其實水小則無須抵禦水大則易於衝坍壩工既難經久自可無庸修
復各等語迨至光緒十九年十一月間欽派前東河總督許振禱來直會勘永定河上下游工程籌商辦
法彼時亦有建言請在蘆溝橋以上百餘里擇地建壩以殺水勢者經許振禱率同前臬司周馥道員張
蓮芬親往履勘旋據該督臣繞出居庸關北直抵懷來縣之觀高鋪和合口兩崖石壁聳立數仞中如削
瓜下盡沒水兩岸相去二十餘丈與十餘丈不等河水深至五六丈與二三丈不等此險有七十餘里立
足無地峽中不通一人一騎至沿河口以下單騎可通亦不能行車馬永定河發源山西附以塞外諸水
羣支湊赴至懷來縣之水關鋪始併入洋河一大支媯川河一小支三水合流水勢益大不數里而趨入

和合卽有兩岸收束大設奇險無論崖中湍流狂奔不能建壩卽和合口以上一片石沙沙外卽山如欲引水治田則無田可耕且不能設奇築壩激水以上百數十丈之山詳加查勘自蘆溝橋以上直抵懷來宣化實不能建壩分水等情覆陳在案參稽往籍證以近事是永定河上游建壩分水乾隆年間曾經議行而無成效近年許振禕親往查勘亦謂勢不能行惟黃思永所稱四川離堆堰式與高斌前築之玲瓏壩較爲得法亦未嘗不可採擇而行期於河工有益該侍讀所陳之直隸候補道衛杰籍隸四川在直隸服官有年雖未辦過永定河大工而於畿輔水利平時尙能講求奴才當將該員由保定飭調來津面加考詢據言該道曾在川省充過堰長夙諳離堆辦法四川離堆堰係總竹積石以分水力而濬洪流兼利灌溉其溜灘之法意在停渾流淤其築堰之法意在蓄水分泄查岷江湍流來源由羌地羊膊嶺而下較永定河流爲速其形勢山崖夾束萬壑千谿亦與永定河頭大致相似可以試行籌辦惟必須親赴上游詳勘水勢方能酌擬辦法等語奴才現擬卽飭該員前往永定河上游一帶妥細查勘乾隆年間所築之玲瓏壩何以不能經久行之無效如較四川離堆辦法較勝從前之玲瓏壩究須建立幾處每處需款若干於該處上游有無阻遏壅淤之虞果能確有把握切實可行卽詳晰議覆再當奏明責成該道妥慎辦理得旨著卽督飭認真查勘是否切實可行妥籌具奏勿稍含糊○甲戌諭御史彭述奏特旨擢用人

員無論捐納勞績請飭部妥議班次並請將奏調奏留在外當差之京員與候選人員一併明定章程不准免扣資俸及免扣選各摺片著吏部議奏○諭自來致治之道首重得人彰擢兼施人材始奮近以時勢多艱朝廷求賢若渴於各督撫專摺保舉無不立予召見以備隨時擢用乃近來封疆大吏但多保舉絕少參劾之奏有舉無懲豈芳雜出其何以澄敘官方嗣後各該督撫於實心任事之員當核實具保其有聲名平常或貪虐有據者應從嚴甄別以儆其餘倘意存姑息徒博寬大之名置民瘼於不問該督撫責有所歸公是公非難逃洞鑒也將此通諭知之○乙亥戶部尚書王文韶工部左侍郎許景澄與俄國駐京臣格爾思議立勘分旅順大連灣租界專條八款成其文曰 大清國家專派委員花翎道員用候補知府福培花翎知府用前署金州廳海防同知涂景濤大俄國家專派委員坐探中國武備委員督辦營務處副將官倭高格督辦營務處遊擊官伊林思齊各奉本國剏派會同照勘遼東半島俄國租地之陸地北界按照 華歷光緒二十四年四月初六日俄歷一千八百九十八年四月十五日 北京條約第一款就地劃界為標明界址所在共立界碑三十一塊以俄字母按次為記即自阿始至額終又加立小界碑八塊以號碼為記即自第一始至第八終茲該委員等會於旅順口議訂條款如左 第一款 按照 華歷光緒二十四年三月十八日俄歷一千八百九十八年四月十五日 彼得堡續約第一款遼東半島俄國租地之陸地北界自半島西岸之亞當灣北岸起往東開

有偏北偏南至半島東岸之狹子窩灣北岸終阿字界碑即中國第四碑立於五湖嘴之防風山亦名亞楠山南岡

頂距聚房身屯西盡處之西南二百六十俄丈即羅經距聚房身屯往高家屯車道之北九十俄丈由阿

字界碑起界綫一面往南至亞當灣北岸直出往英國海部第二千八百三十三號地圖所記四百三十

英丈高之陰嶺山頂一面往北微偏東順防風山脊而走長六百四十俄丈並在防風山脊極北山頂加

立第一小界碑距二道嶺子聚房身兩屯往老爺廟車道岔口之南四十五俄丈由此小界碑起界綫

偏東往黃衣山南坡之亂葬岡即義岡而止在亂葬岡東圍牆立巴字界碑即中國第四碑第一小界碑二百三

十五俄丈聚房身屯土地歸入俄國租地其亂葬岡留在隙地之內由巴字界碑即中國第四碑起界綫往東二

道嶺子姜家爐及兩屯土地歸入俄國租地其花兒山屯土地留在隙地之內在姜家爐北山頂之南邊

立瓦字界碑即中國第四碑距巴字界碑六百八十俄丈由此界碑起界綫微偏北陳家屯及其土地歸入俄國

租地孫家屯及其土地留在隙地之內在孫家屯東北之山岡南坡加立第二小界碑距孫家屯九十俄

丈距瓦字界碑三百八十俄丈界綫由此偏往東南順陳家屯土地北界而走直至俄國租地內三官

廟及其土地與留在隙地姜家屯之分道處囑字界碑即中國第四碑立於附近陳家壩平坡之高頂距第二小

界碑六百二十俄丈由囑字界碑起界綫往東微偏北留韓家屯及其土地於隙地之內在驛山西北前

山頂立達字界碑

即中國第五碑

距曠字界碑一千一百九十二俄丈由達字界碑起界綫往東微偏北至自西

自南繞過花山屯之無名小河在小河右岸

即西岸

橫過花山屯之車道處加立第三小界碑距達字界碑

二百一十六俄丈然後界綫順此無名小河左岸

即北岸

至平陽河口再順平陽河右岸

即西岸

至被花山屯

往孫家大道鋪屋車道橫過平陽河之處即在橫過處左岸

即東岸

立即字界碑

即中國第六碑

距花山屯東口二

百一十俄丈距第三小界碑四百四十五俄丈由即字界碑起界綫順花山屯往孫家大道鋪屋車道北

邊而走在孫家大道鋪屋西口加立第四小界碑距即字界碑一百七十俄丈然後界綫自北繞過孫家

大道鋪屋及其土地歸入俄國租地經在舊家屯小徑距孫家大道鋪屋東北二百二十五俄丈之第五

小界碑又微偏南至老平山之北前山頂在此立熱字界碑

即中國第七碑

距第五小界碑二百八十四俄丈由

此界碑起界綫往東偏北至後舊家屯西口小廟自西繞過此歸入俄國租地之後舊家屯及其土地往

下順往李家屯車道北邊而走留周家山嘴大李家屯兩屯於隙地之內即於安子河左岸

即東岸

附近此

河水邊處往李家屯之車道旁立皆字界碑

即中國第八碑

距熱字界碑一千二百四十俄丈由皆字界碑起界

綫往東順李家屯街上老葉家大周家屯土地中間往李家屯之車道北邊而走李家屯歸俄國字用其

街上老葉家大周家屯留在隙地之內由距皆字界碑一百三十俄丈李家屯車道之陡轉處界綫往舊

家塋而走然後至李家屯往于家屯之車道北邊沙河安子河分水嶺之牧牛場高頂立伊字界碑即中國第九

距李家屯三百零二俄丈距舊字界碑七百六十俄丈界線由此順李家屯往于家屯之車道北邊而

走于家屯後繞石屯歸入俄國租地韓家莊留在隙地之內即於後繞石屯西北山岡立亦字界碑即中國第十

距此屯一百五十五俄丈距伊字界碑八百六十五俄丈然後界線往沙河而走後繞石屯及前繞石

屯歸入俄國租地韓家莊留在隙地之內即於沙河右岸即南後繞石屯往沙河左岸即北橋頭屯道邊

之沙土堆立喀字界碑即中國第十一碑距亦字界碑七百零五俄丈由喀字界碑起界線順沙河右岸即南而

走往龍王廟山麓之第六小界碑長八百九十俄丈即北由此過沙河左岸即北距橋頭屯六百七十俄

丈距第六小界碑二百零七俄丈立拉字界碑即中國第十二碑由此界碑起界線順沙河左岸即北而走至流

入沙河之小河口在此立瑪字界碑即中國第十三碑距拉字界碑六百六十八俄丈高家店李家店留在隙地

之內然後界線往東北而走繞過大晏家屯土地在往屯之道邊立那字界碑即中國第十四碑距大晏家

屯五十俄丈距瑪字界碑三百九十俄丈七耳溝大晏家屯土地歸俄國享用其李家屯留在隙地之內

由那字界碑起界線往小晏家屯北口而走繞過此屯經臺子山南上距那字界碑八百八十俄丈之樓

子山俄名臺尼爾來山頂其小晏家屯隨家屯歸入俄國租地由樓子山頂起界線一直往東在樓子山東岡第

二頂立倭字界碑即中國第十五碑距那字界碑一千二百四十俄丈距樓子山頂三百六十俄丈界綫由此微

偏南經楊家溝房屋此溝留在隙地之內在山嘴立帕字界碑即中國第十六碑距楊家溝一百九十俄丈距倭

字界碑七百零五俄丈然後界綫方向與前相同至夾河右岸即西岸在右岸沙土岡北根樹林北半立帕

字界碑即中國第十七碑距帕字界碑七百八十俄丈其姜家歲子屯土地歸入俄國租地郎家屯大磨家屯及

其土地留在隙地之內山咀字界碑起界綫過夾河微偏南經巴家屯北巴家屯及其土地歸入俄國租

地在巴家屯東南岡頂立薩字界碑即中國第十八碑距巴家屯二百四十俄丈距咀字界碑七百四十俄丈界

綫由此一直往東經夾河廟北一百五十五俄丈之房屋直出至葫蘆頭西山頂在此立土字界碑即中國第十九碑

距夾河廟東北三百八十俄丈距薩字界碑八百八十俄丈其張家溝屯留在隙地之內界綫由此

微偏南經葫蘆屯北一百五十俄丈之房屋上自葫蘆頭往東南之山脊立烏字界碑即中國第二十碑距土字

界碑七百俄丈葫蘆屯大磨家屯歸入俄國租地葫蘆頭留在隙地之內山烏字界碑起界綫仍按從前

方向而走過小河上老風子岡在岡頂附近墾地立福字界碑即中國第二十一碑距烏字界碑六百二十俄丈小

樂家屯土地歸入俄國租地劉家屯小陳家屯及其土地留在隙地之內然後界綫偏北往山嘴屯順屯

南小河左岸即北岸至小河流入清水河之河口過清水河及清水河左汶之萬家溝河在萬家溝河之左

岸即東岸立哈字界碑即中國第二十二碑距鄭家窰一百二十俄丈距福字界碑七百二十俄丈大連窰子及其

土地歸俄國享用其小老虎峪山嘴屯兩屯留在隙地之內山哈字界碑起界綫順萬家溝河右岸即北岸

而走至河之往北陡轉處距萬家溝屯西北一百二十二俄丈在河之左岸即東岸立茨字界碑即中國第二十三碑

距哈字界碑九百八十五俄丈鄭家屯三官廟屯留在隙地之內界綫由此微偏南經歸入俄國租地之

萬家溝屯並礮臺子屯北至貔子窩往蓋州之大道在橫穿此道之楊家屯車道處立碑字界碑即中國第二十四碑

四距礮臺子店北五十五俄丈距茨字界碑六百五十俄丈山碑字界碑起界綫順成為礮臺子店土地

北界山溝之北邊而走至崗頂在隙地內立王家屯廖家莊分道處加立第七小界碑距碑字界碑

三百六十俄丈界綫由此往廖家莊順莊之南口而走至小崗嘴在此立沙字界碑即中國第二十五碑距碑字界

碑九百六十五俄丈礮臺子礮臺子店王家屯土地歸入俄國租地其楊家屯安家屯宋家屯廖家莊留

在隙地之內山沙字界碑起界綫直出至河溝右岸即南岸順河溝而走至貔子河往下至河之分為雙汶

處在此加立第八小界碑距沙字界碑一千二百六十俄丈然後界綫往留在隙地之曲家屯至高家店

北之山脊在岔道附近處立又界碑即中國第二十六碑距高家店三百三十俄丈距沙字界碑二千一百六十俄

丈界綫由此往高家塾樹林南邊而走至潮溝產在此立爾界碑即中國第二十七碑距又界碑七百八十俄丈高

家店土地歸俄國享用其高家屯齊家屯留在隙地之內由耶爾界碑起界綫往林家屯即林家屯坎子屯歸邢家屯

潮溝崖於俄國租地留沙泡子於隙地內依耶爾界碑即中國第二十八碑立在阮窪處距林家屯西北五十俄丈距

爾界碑一千二百九十二俄丈界綫由此往樅樹風墳塋在牟家屯北二百四十俄丈由此屯往北之車

道旁立葉爾界碑即中國第二十九碑及依耶爾界碑五百八十俄丈林家屯即林家屯坎子屯牟家屯土地歸俄國享用然後界

綫微偏南至距王家坦屯北一百五十八俄丈之烽臺在由牟家屯往吳家屯去烽臺南二十俄丈之車

道旁立牙提界碑即中國第三十碑距葉爾界碑一千一百三十五俄丈孫家屯王家坦屯土地歸入俄國租地其齊

家溝屯留在隙地之內由牙提界碑起界綫多偏南直出至火神廟高山角在角頂立額字永碑即中國第三十一碑

距爾南一百五十二俄丈距牙提界碑一千二百零五俄丈界綫由此往東南而走下往大海長二百俄丈

吳家屯及兩王家屯土地留在隙地之內 第二款 此次專條第一條所定邊界其屯莊土地錯出錯

入設有齟齬兩國邊界本管官應切實按照此次所定專條第一款互相核辦 第三款 按照華歷光緒二十

四年閏三月十七日俄歷一千八百九十八年四月二十五日彼得堡續約第二款自毗北連遼東半島俄國租地之隙地陸地北界由

半島西岸之蓋州河口起往東偏南經過歸入隙地蓋平縣城州即蓋州及隙地外姚家店中間然後界綫仍

按前方向往大洋河而走自北繞過隙地內之岫巖州城過大洋河左岸即東岸界綫又順此左岸往下至

河口在半島東岸為止 第四款 此次專條第三款所定隙地陸地北界按照

華歷光緒二十四年閏三月十七日俄歷一千八百九十八年三月十五日

彼得堡續約所附地圖舉其綱領若必須詳細就地勘劃界綫兩國另應派員核辦 第

五款 按照

華歷光緒二十四年三月初六日俄歷一千八百九十八年三月十五日

北京條約第一款暨

華歷光緒二十四年閏三月十七日俄歷一千八百九十八年四月

二十彼得堡續約第一款又按照北京俄國使署與總理各國事務衙門商定遼東半島租界西岸附近

水面陸地北界緯綫以南各島均歸俄國享用惟鯨鯨島南段歸俄國租界內北段歸入隙地此島詳細

勘劃在後又租界東岸附近水面所有各島在北界緯綫以南者均歸俄國享用而以劃入俄國租界內

之海洋島作為遼東之界 第六款 遼東半島租地陸地北界緯綫以北在隙地內東西岸附近水面

各島均應照

華歷光緒二十四年三月初六日俄歷一千八百九十八年三月十五日

條約第五款暨

華歷光緒二十四年閏三月十七日俄歷一千八百九十八年四月二十五日

續約第五款所定隙地辦法 第七款 按照北京俄國使署與總理各國事務衙門商定所有遼東半

島以南廟羣各島不歸租界之內而中國允認不能將該全島或一二島讓與別國及別國之人或永遠

或暫行享用並不能在此羣島開設通商口岸亦不能在此各島准與他國人民造鐵路開礦及工商利

益各事 第八款 此次專條所定界碑自本年為始每逾三年應行查閱屆期交界本管官各派一員

會於一定處所順界綫而走查閱大小界碑查閱時如大小界碑見有損壞或全然損壞者查閱官切實

遵守此次專條並附於此次專條之圖仍就原處重立兩國委員此次所定專條以俄華文字各備四分
書押蓋印以昭信守校對相符遇有辯解要以俄文字為憑此外委員等將界綫繪圖註以俄華文字用
紅色標明此次專條所定界綫並就圖書押蓋印為憑兩國委員將新界專條互換後應將專條分呈駐
劄北京俄國公使及總理各國事務衙門以便批定完結此次專條於華歷光緒二十五年正月十七日
俄歷一千八百九十九年二月十
四立於旅順○丙子調藍斯明為河南歸德鎮總兵楊玉壽為直隸正定鎮總兵○是月比利時國使臣
費葛回國參贊賈蘭牒署理

夏四月戊寅朔時享 太廟遣河靜恭代行禮○己卯諭御史葉慶增奏州縣捕務廢弛盜賊公行地方
匪徒開坊聚眾並州縣辦理團練保甲流弊滋多各摺片又御史陳慶桂奏盜風日熾請飭清查匪鄉一
摺緝盜安良為地方有司專責若如該御史等所奏浙江寧波等府盜案迭出並有匪徒開設花會廟會
聚眾誘財廣東搶劫之案甚多並有擄人勒贖等事非嚴行懲治何以安輯閭閻此等弊端恐他省亦所
不免著各該督撫飭令地方文武認真查拿從重懲辦務絕盜源該管各官如有緝捕不力失察勇役串
同盜劫各情弊卽著嚴行參處至團練保甲地方更為切要之事如有不肖官紳藉端需索擾累民生並
著查明一併參辦○諭翰林院侍讀學士潘祖蔭奏各省外銷款項濫支太多請飭核實充公一摺近因庫

儲支絀迭經各督撫裁汰冗員剔除浮費務期涓滴歸公茲據該侍讀學士奏稱各省鹽務海關釐局多有自謀津貼及代薦乾修等事該管官廳徇情面輒於外銷欸內設法挪移種種名目幾倍於正用之欸等語各省鹽課關稅釐金皆為帑項要需豈容任意濫支濫銷應著各將軍督撫嚴行查核如有前項情事悉令迫出歸公專案報部以裕正帑而杜漏卮現在時事多艱部庫支絀該將軍督撫等務當破除情面認真整剔毋得任聽經理之員彌縫掩飾一奏奉 諭旨○庚辰以李光久為浙江按察使○辛巳諭薛長榮和所部仁育兩軍均歸盛京將軍增祺節制所有該省軍械糧餉等事著該將軍認真經理以專責成○張之洞于陸霖奏訟獄為牧民之一事亦即累民之大端迭奉 諭旨殷殷訓誡自非酌定切實章程認真整頓不足以挽積習而清訟源此次所定章程大指有四一在禁欺飾不清而捏為清不結而飾為結其咎尤在疲玩遲延之上應行嚴加懲儆此次擬定簡明冊式飭令隨時逐案登註呈查不煩另造冊報事簡易行俾無遁飾一在重命盜積案懸擱皆為民累而命盜案遲延民間受害尤鉅查命盜獲犯審結例限本嚴應即核實督催考察不容藉端規避一在省擾累傳集人證其可用保釋傳喚者即不許票差如必須票差者亦不准多派此次簡明冊內另行刊發諭單責成保釐傳喚以免需索騷擾一在懲刁誣積案之多半由訟棍扛幫痞徒加捏纏訟不休本可惡而不惡不應翻而復翻或圖掩累害人或冀延

訟取利州縣官不能不奪其目力分其神思以致聽斷愈形允迫總由向來習爲寬弛於誣告罕有辦反坐者茲擬於審明誣告者及查出訟棍主唆者認真按律治罪杜無情之講張然後可伸真正之冤抑總之以求實爲主以治要爲先等因現經札飭藩臬兩司嚴飭各府州縣遵照現定章程認真辦理惟是積習已深若於從前戒玩者不與量加懲儆則章程雖立亦未必實力奉行茲查有積案記過較多之前署大冶縣知縣林佐等請 旨摘去頂戴儆以後不知愧奮再行據實參劾此外業經卸任各員並飭司分別停委現值整飭伊始臣等未便操之過驟自當隨時考察嗣後如有陽奉陰違不知振作者定卽從嚴參處謹將現定章程十三條繕具清單恭呈 御覽得 旨林佐等均著摘去頂戴如再不知振作卽行嚴參餘著照所議辦理單併發○癸未長祿病請解任允之○以山東補用副將原邦彥承造礮船浮冒革職監追○文興晉昌奏上年十一月十九日承准軍機大臣字寄光緒二十四年十一月十三日奉 上諭有人奏盛京新鑄銀圓定價過昂一經出城價便跌落皆官錢局設謀漁利等語著依克唐阿體察情形認真整頓原摺片著鈔給閱看等因欽此遵 旨寄信前來依克唐阿當飭承德縣出示先減銀圓價值一面派員赴滬購銅設鑪鼓鑄意在使現錢充足銀價可平未及覆奏因病出缺奴才等接任後體察情形省城糧貨騰貴銀價日漲市面生意蕭索誠有如原奏所云者然其病在現錢短絀貼錢壅滯初

不得專咎銀圓之定價昂也且亦商人自爲之而官錢不得專其利並不得擅其權查依克唐阿原定章程鑄出銀圓隨同各城銀價漲落如市平銀每兩價值東錢十千銀圓合市銀七錢四分三釐卽定價七千三四百文仍按照每月初一十六兩日銀行定價由地方官出示並各鋪面懸掛水牌半月一換俾衆周知業經奏明有案是銀圓價雖官定實與商定無異近來省城銀價較各外城爲昂銀圓出城價便跌落自爲勢所必然銀價既漲物價隨增而居民因之受困亦係一定之理且官局所存係本省銀圓而各鋪所存多係洋圓間有各省龍圓目下省城行用洋圓並外來銀圓多於本省所鑄者不啻倍蓰半係奸商謀利販運而來如以新鑄銀圓定價過昂何以外運來者亦復一律定價此實商人之爭利自失其利而非官錢局之漁利已確有明證矣奴才等細加酌度本省所鑄銀圓可以攤納賦稅可以搭放薪餉其行用與洋圓不同斷不可使洋圓同價致礙銷路然當此銀行盛漲設銀圓定價過低勢必賠鑄費而無餘利事關迫省錢法不得不博訪周諮集思廣益以求妥善當經傳集驛巡道各司協領並承德縣知縣及行廳委員等商議辦法有請禁用外來銀圓兼平銀行者有請減銀圓成色藉以減價者並未有請停鑄銀圓專鑄制錢者其說紛紜而終不如署承德縣知縣增韞所擬定銀圓準價地期行厲禁兩端爲最切要據增韞稟稱奉天現銀現錢異常缺乏從前官吏均聽商民開設期行以資週轉行之今日歷有年

所遠近通行從無窒礙自軍興以後商帖以現錢愈少相率不開專賴期行銀錢以撐市面於是不肖奸商轉得以無銀無錢藉詞竟成賣空買空之弊故前年另案興訟因噎廢食遂使期行亦從此停止今鑄銀圓正好補苴而風氣未開行使不暢按日隨銀作價商民苦於數目之繁咸稱不便且價目時有長落賠累堪虞而各城銀行遠近不一安望其能到處通行因念商帖鈔票均係遠近一價無銀行長落之虞若將本省鑄出銀圓仿照吉林章程由省城官司酌定牢不可破之價等諸錢帖鈔票之用通省無論遠近一律行使不准此多彼少並准完納稅釐錢款務使商民易於信從行旅樂於攜帶至期銀期錢亦請仍聽商便照舊開行但令到期專以本省銀圓或市面寶銀按數開付不准憑空買賣以杜流弊其別項銀圓仍作銀用如何作價聽商自便似此辦理庶例章無礙錢法可通等語其於商務民情可謂體實入微而於銀錢壅滯之患亦復洞見癥結奴才等現已酌擬本省銀圓每圓價值東錢六千二百文合制錢一千一百文以爲定價仍弛期銀期錢之禁嚴絕賣空買空之弊俟試辦一年後察看情形如果商民稱便不得輕事更張以免紛擾倘法未盡善尙需稍事變通再行奏明辦理總之期行有禁商買不前則銀圓之銷路難暢銀圓不通銀錢兩缺則期行之過帳仍虛二者相輔而行不可偏廢此閩省之輿情非一人之私論也報聞○諭近因時事艱難朝廷宵旰焦勞孜孜求治迭經諭令各省督撫將地方應辦事

宜認真整頓不啻三令五申旋據該督撫將所籌練兵籌餉保甲團練積穀各事宜先後覆奏詳加披覽
該督撫所陳各節雖不致盡託空言亦未能確收實效當此時艱孔亟尤宜上下一心共圖治理各該督
撫均係特加簡擢受恩至深若再因循觀望不能仰體憂勤惕勵之心振作之機當在何日用特再加申
諭著各督撫於奉到此旨後將現在籌辦之事速即認真舉辦仍將有無成效情形先行據實具奏至民
爲非本近來飭辦各件皆所以休養生息爲民籌計倘有不肖州縣玩視民瘼陽奉陰違該督撫卽當嚴
行參劾從重治罪倘該管上司不行揭報封疆大吏不卽核實嚴參是罔恤民艱國法具在朝廷亦不能
曲爲寬恕也將此通諭知之○甲申以恩壽爲江甯布政使陳潔霖爲江西按察使○乙酉常壽大祀
天於 闕丘遣凱泰恭代行禮○長庚奏查邊界交涉事務無論大小均應卽時立辦方免延誤塔城距
伊犁寫連文牘往還動需兼旬該處交涉事件關繫緊要不減伊犁向時設有通商總局歸駐紮塔城接
辦參贊大臣事務伊犁副都統就近經理管轄似與交涉事件實無二致應否亦照將軍督撫之例畀以
兼銜之處出自 聖裁得 旨接辦塔城參贊大臣伊犁副都統著兼總理各國事務大臣銜○己丑命
剛毅前往江南一帶查辦事件○庚寅三寶多病請解任允之以其子察罕伯勒克爲阿拉泰烏梁海副
都統○辛卯兩○以楊寶華爲兵部左侍郎○壬辰諭本日召見之工科給事中慶祥難勝言官之任著

回原衙門行走○諭許應騷奏福建廈門設立保商局保護出洋回籍華商一摺閩民出洋者多精練漳泉以廈門爲孔道此項民人不忘故土偶一歸來則關卡苛求族鄰詐擾以致聞風裹足殊非國家懷保小民之意著准其於廈門設立保商局遴選公正紳董妥爲辦理凡有出洋回籍之人均令赴局報明卽爲之照料還鄉倘仍有各項擾累情事准受害之人稟局立予查辦以資保護而慰商民○欽奉 慈禧端佑康頤昭豫莊誠壽恭欽獻崇熙皇太后懿旨本日據榮祿面奏總統武衛全軍四川提督宋慶現在患病著賞假兩月安心調理並賞給人參五兩活絡丹十丸俾資調攝所有該軍營務著總兵馬玉崑暫行經理仍著遇事稟承該提督指授不得稍有違誤○諭軍機大臣等練兵爲當今最急之務迭經諭令各直省認真訓練現據將軍督撫先後覆奏各省所練兵勇多寡不同總以精強爲主庶幾制勝可期現在訓練已經數月當已確有成效際此時艱孔亟折衝禦侮必須備豫不虞著各將軍督撫隨時認真校閱務使悉成勁旅毋得稍涉懈怠仍將練成各營確數暨陣法技勇如何限三箇月先行具奏聽候次第調取來京閱看將此諭令知之○乙未以記名候選道李徵庸捐募徐海等屬賑款交部引見○黃槐森奏臣欽奉 諭旨練兵等務均著將籌辦情形迅速具奏等因當經欽遵將辦團保甲積穀事宜據實奏報又將農商工務專摺具陳在案現值時艱孔亟練兵尤不容稍緩臣查光緒六年內經升任撫臣張樹

弊以廣西制兵餉薄訓練不精不得其用奏請參酌直隸練兵章程於省標及提鎮各標抽練兵丁應加
練餉督飭營後局司道妥議籌畫未及舉辦旋即卸事接任撫臣慶裕抵粵受篆查各營兵丁平時非不
操練祇以餉薄兵艱必聽兼謀生計不能逐日講求戰陣致難得力照案飭令該局司道仿照直隸章程
酌議加給兵丁練餉及營哨員弁薪水雜費正兵一名合原營底餉及加給練餉每月共給銀二兩四錢
親兵護兵每名月給底餉練餉共銀二兩七錢長夫每名月給底餉練餉共銀三兩六錢長夫每名月給
銀一兩五錢管帶營官月給薪水銀四十兩哨員月給薪水銀十兩哨長月給薪水銀六兩均較直隸定
章有減無增以五百人爲一營聚紮訓練省標提標各抽練二營鎮標各抽練一營奏明舉行並將章程
報部查核自紮營以後訓練尙有實效所加練餉等項及應需軍裝由局籌款供支於軍需案內報銷在
案嗣因法越搆兵邊防喫緊軍用浩繁入不敷出所加練餉難於兼顧經前撫臣倪文蔚潘鼎新先後奏
明停止所有抽練之兵悉令歸伍仍照常例操演臣維廣西練兵既舊有規模可期多一練兵卽得一兵
之用未便因餉項短絀遽不講求當經督同省局司道通盤籌畫勉力酌辦先就臣標左右營桂林營各
挑練兵丁二百名並咨會提鎮臣於提標及左江右江柳慶之鎮標各挑練兵丁二百名共練兵一千四
百名皆須一律精壯不得以老弱充數所加兵丁練餉卽照前撫臣慶裕原定章程給發其營哨官等薪

水則照原章酌減以歸節省按日由營後局解款支放毋令缺乏其餘各營俟餉有可籌再行推廣所挑兵丁卽聚紮成營責成營哨官逐日勦加訓練按期操演隨時操練校閱務成勁旅各將弁有怠忽偷安卽行撤參示儆省標已先於上年八月聚紮操練日夜分派巡防頗有實效其提鎮各標成營日期俟報到彙咨達部並飭局造具練營弁兵花名口分糧餉清冊送部查核放過練餉及製辦軍火等銀按年照案歸入軍需報銷得旨知道了餉章既定操法仍宜講求毋蹈空言○丁酉上御勅政嚴法國使臣畢盛觀見○淑長順赴吉林稽察練兵事務○興廉病請解任允之○裕祿奏據山海關道明保詳稱前奉行知光緒二十五年正月十七日欽奉 上諭各省應解部庫各款一律著解實銀其沿江沿海及近畿各省於應解部庫各銀款內並著搭解制錢一成以資挹注等因欽此遵查銀價日落錢價日昂曾經設法疏通改用銀圓以資補救無如商民拮据甚深一時未能週轉若再收集現錢搭解部庫不特有礙民用亦恐爲數不足況營口向來鼓鑄制錢更屬無從措手若借助於直省之鑄隨時鼓鑄其中工本運費折耗太多無款開鑄擬請將解部之款概行報解現銀其搭解一成制錢暫請從緩未闕法疏通再行搭解等情詳請具奏前來奴才覆查直隸前以應解部款搭解一成制錢市面現錢缺乏收集恐妨民用因而奏請試鑄制錢搭解部庫經戶部議奏以鑄錢工本虧折太多其虧耗之數核與廣東無異按照廣

東之案緩俟銅價稍平再行加鑄以供搭解等因欽奉 諭旨依議欽此咨行遵照在案今山海關制錢
缺乏情形正與直隸相同若由直隸代鑄則工本運費所虧更鉅查該道所詳委屬實情所有應解部款
搭解一成制錢之處應請暫行從緩仍俟銅價稍平圖法疏通直隸果能加鑄搭解該關再當一體辦理
得 旨知道了仍著俟銅價稍平即行設法購備加鑄搭解○裕祿奏北洋前因添練武衛五大軍並准
練各軍新改營制各州縣奉辦團練所需軍械繁多局存不敷分撥亟應豫為籌備當經咨商南洋大臣
劉坤一於金陵軍械局所存各種鎗礮內酌調若干以資撥用茲准撥檄南洋存儲鎗礮近年協撥廣東
廣西江西湖北四川等省現存已不甚多惟北洋為近畿門戶各軍拱衛京師自應不分畛域設法勻撥
擬將小口徑毛瑟快鎗酌撥二千桿配子彈一百萬粒九響毛瑟快鎗酌撥二千桿配子彈四十萬粒前
膛馬鎗酌撥四百桿曼利夏馬鎗酌撥二百桿配子彈六萬粒大生特過山快礮酌撥七尊配開花彈子
一千顆銅五件一千副葡萄彈一千顆藥袋二千箇拉火二千枝至洋式後膛擡鎗每年本有接解北洋
備用之數現飭金陵機器局趕緊製造陸續分解咨由 奴才奏明立案等情理合附片具奏下部知之○
戊戌 慈禧端佑康頤昭豫莊誠壽恭欽獻崇熙皇太后 皇上御儀鑒殿德國使臣海靖謁見○賞豐
陞阿副都統銜作為庫倫辦事大臣○己亥諭御史潘慶瀾奏福建廈門設立保商局保護出洋回籍華

商請飭海疆各省一併推廣等語通商以來沿海各省多有華民出洋貿易其隨時回籍者自應由官設法保護著南北洋大臣及沿海各督撫體察情形查照福建保商局章程遴選公正紳董妥籌辦理如有關津留難官吏苛索各情弊一經查實卽著從嚴究辦以恤商民○辛丑以張翼爲內閣學士○壬寅鄧華熙奏花翎員外郎翁世瓊捐助皖賑銀一萬大千兩請以道員分發河南試用下戶部議奏○諭軍機大臣等前因天津上海江甯湖北等處均有製造鎗械局廠諭令該督等切實會商務將所製鎗礮膛口子彈各局統歸一律以期通用並將每年所造鎗件子藥若干據實奏報並按季咨報戶部備機營查核現在爲時已久並未據報有案鎗礮爲行軍要需豈容因循延玩著裕祿劉坤一張之洞詳晰查明各該局廠所造鎗礮究係何項名目是否業已會商造成一律迅卽切實奏報嗣後仍遵前有按年奏報並按季分別咨報毋得延宕該督等務當懷遵迭次諭旨督率承辦各員認真經理精益求精互相接濟臨時不致缺誤倘該管局員草率從事虛糜經費或演放時有炸裂等項情弊定卽治以重罪決不稍從寬貸將此諭令知之○癸卯諭長萃等奏旗丁領米逞刁肆鬧擾實屬聞並將米樣呈覽一摺八旗兵丁加賞米石按照戶部奏定章程應以九新一陳稷糴一半開放不得稍有攙雜所呈三色米樣尙屬淨潔著卽迅速一律開放該旗亦卽如期關領俾兵丁等早沾實惠毋得抗延至所奏正黃旗滿洲領米兵丁等逞

刁肆開並另片奏鑲黃旗滿洲領米副都統明惠以他旗副都統入倉挑剔米色各等語詢據禮親王世鐸面奏是日正黃旗滿洲赴倉業經看定米樣將欲開放該倉花戶等忽行散去無從具領究竟是何情弊著倉場衙門及各該旗都統分別查明據實具奏○甲辰諭前因總理各國事務衙門章京劉慶汾呈請印造銅錢並通用大小銀圓當經兩次交總理各國事務衙門議奏茲據該衙門奏稱迭次委員考察皆稱改鑄銅錢通行銀圓有利無弊等語現在圖法未能整齊亟應變通盡利著派慶親王奕劻軍機大臣會同戶部妥辦以機器製造銀圓銅錢應如何酌定章程以期推行盡利之處次第妥籌具奏○張之洞于陵霖奏光緒二十五年三月十九日准兵部火牌遞到軍機大臣字寄光緒二十五年三月初八日奉 上諭戶部奏遵議八旗兵丁加放甲米通盤籌畫一摺近年糧價日昂旗兵困苦太甚必宜設法變通惟現在京倉所儲僅供常年支放所有折漕各省自應規復本色以備加放著各督撫通飭有漕各屬州縣自本年冬漕爲始全數改徵本色妥籌運京並先將按年起運數目及如何籌運辦法迅速覆奏欽此遵 旨寄信前來等因承准此遵卽恭錄行知司道欽遵妥籌去後茲據布政使晉聯督糧道韓啟宇會同詳稱鄂省自改折以來迄今四十餘載民間相安已久完納亦甚踴躍若驟令規復本色則徵米微銀利弊懸殊節經各前司道屢詳奏咨在案現在通盤籌畫未能遽復舊制惟查歷經採買米石經過交

納自光緒二十三年奉准部文飭將此項米價運費銀兩撥補鹽盤採買因之停止茲奉 諭旨力圖儲備擬請本年循案採買以資接濟等情會詳前來 臣等伏查鄂省漕米改折自咸豐三年部文定價每石一兩三錢變價解部其時軍務倥傯並未舉辦延至七年始經前撫 臣胡林翼奏定章程通飭辦理計北漕一項徵正耗米僅十五萬石有奇而減徵折色減裁各費約得銀四十萬兩當時接濟軍需至現今之京餉邊防洋款皆恃此以挹注是以 文宗顯皇帝有能不顧情面社百年之積弊甚為可嘉之 諭法良意美利賴至今竊查原奏有云將來軍務完竣卽以此項解部若北倉需米卽以此項採買海運亦不致有缺誤等語當時運河淤滯度未至如近年之甚而已豫定折銀解部並舉今日北倉需米採買海運均在深思早計之中查湖北近年北漕耗額照中稔之年約徵銀十七萬餘兩以每石一兩三錢計之應徵米十三萬餘石耳而一切隨漕軍丁安家幫津水腳兌費向因折色而悉歸公款者改徵本色則仍還之雜費矣現計每年動支各款銀三十四萬兩以收抵支尙有不敷今若復加本色無論於民多所不便卽指撥各款先已一無所出此鄂省漕米礙難規復本色之實在情形也查湖北糧庫同治十三年以來均在漕餘項下提銀七萬兩出買正米三萬石運通應屆循辦有案自二十三年間奉部將此項撥補鹽盤現在卽無的款可指惟京倉關繫甚重旗民困苦日甚欽承 諭旨飭令中外籌辦 臣等具有大良何

敢稍存諉容避與司道切實籌商無論何項正款均當先其所急飭令於本年冬循案買米三萬石委員運交通倉稍資接濟以冀仰慰宸廑至此後能否如數照常運通實亦未敢豫料蓋緣折徵正餘各項皆已支撥無存全持節節籌挪委實毫無把握此又等竭力紆籌而不敢不先事陳明者也得旨如所請行○乙巳諭前據倉場衙門奏旗丁領米肆橫當經諭令該衙門該旗都統分別查奏茲據倉場侍郎稽察北新倉給事中正黃旗滿洲都統等奏遵旨查明各一摺倉場爲兵丁計口授食之需迭飭該衙門務須揀選乾潔之米照章開放該倉場侍郎自應懷遵迭次諭旨督飭各倉監督嚴禁花戶倉役人等任意攙和藉端弊混各該旗都統尤應嚴查弊竇往往有不知自愛之多領章京等串通該倉花戶舞弊以致兵丁所領之米多不堪食如有此等劣員亟應立予參處參領巴彥布在倉出具白片據稱被兵丁所毆何以不據實稟明都統反在該倉留與親筆字樣情節殊屬可疑著該都統確切查明如有串通倉役扶同舞弊情事卽行據實嚴參倘係兵丁藉故朋毆應卽查明從重懲辦毋稍輕縱○諭從來練兵籌餉事理本屬相因近日朝廷整頓庶務於籌餉一事尤在所當急各省關稅釐金鹽課等項取之於民歲有常經倘使各督撫能認真整頓裁汰陋規剔除飽餉事涓滴歸公何患餉源不濟無如封疆大吏瞻徇情面不能力祛因循積習以致委員司巡人等窟穴其間種種侵欺難以枚舉此後若不認真革除必

致日甚一日將復何所底止著大學士軍機大臣六部九卿將各省關稅釐金鹽課詳加查核應如何杜絕弊端裨益餉項總期朝廷不加取於民而國用藉資挹注以維大局而濟時艱至各部院堂官如能洞悉各省情形實在足資整頓者不妨直抒所見用備採擇務須坐言即可起行不得以空文敷衍了事○延茂成勳奏奴才於光緒二十四年六月復奏遵查邊荒事宜擬先就五站餘荒勘放附片奏明奉 硃批戶部知道欽此正在遵 旨派員勘放間於是年十二月初九日准軍機大臣字寄奉 上諭恩澤等奏吉江兩省現因放荒混亂界址一摺據稱江省今春招放湯汪河等處閒荒乃被吉林三姓咨攔阻止等語吉江兩省本屬一家朝廷原無歧視該將軍等同屬疆寄於放荒一事自應一氣聯絡和衷商辦著恩澤延茂各按繪圖疆界詳查情形酌妥協奏明辦理等因欽此欽遵當即行知黑龍江將軍在案竊以吉江兩省莫非 朝廷疆土既不可存此疆彼界之心尤不得留顧此遺彼之迹誠如 聖諭所云兩省本屬一家自當聯絡一氣和衷商辦 聖諭煌煌洵宜遵守 奴才等查五站係三姓屬界圖卷繁重多存該副都統衙門當咨令確查去後茲據稱現將存卷檢齊查自乾隆年間奏准分界以後屢經奏明定界放荒等因前來 奴才等詳加查覈該處距省篤遠非僅據圖可定若徒咨函相商恐文牘往還未易明確不如彼此遴派大員親歷界址詳細勘定吉林擬請派三姓副都統保成就近確勘一俟會勘明確再

行奏明辦理下部知之○是月德意志國使臣海靖回國參贊貝威士署理尋以克林德爲駐華使臣

光緒一百五十四

臣朱壽朋敬編

臣沈彭年恭校

五月丁未朔 慈禧端佑康頤昭豫莊誠壽恭欽獻崇熙皇太后 皇上御依鑾殿日本國使臣矢野文雄親見○諭本日召見之浙江候補道劉祖桂著交軍機處存記該員在湖北有經手事件著仍交張之洞差遣委用○諭長萃等奏京倉開放和米竭蹶情形請飭會議章程一摺各倉所存稂米石除稂米各半開放外嗣後八旗應領中米著一種一種相間輪放如倉存和米放竣新漕未到卽一律開放稂米總之無論稂米均須乾潔一色不准攙販據雜卽著該侍郎等督飭監督認真辦理毋庸交戶部八旗都統另議○諭端郡王載漪等奏虎神營訓練五年著有成效請將出力員弁擇尤保獎一摺虎神營自成以來經該王大臣督飭全營翼長認真訓練現在已屆五年確著成效該王大臣公忠篤實倍著勤勞深堪嘉尚端郡王載漪著交宗人府從優議敘協辦大學士兵部尚書剛毅戶部尚書敬信均著交部從優議敘所有該營得力員弁准其擇尤酌保毋許冒濫○松蕃奏查前次迭奉 諭旨飭令各省舉辦團練保甲以輔兵力不足等因欽此奴才竊查前署雲南臬司林紹基等先由省城設局興辦一面刊刷章

程通飭省外各屬一體遵照並將辦理情形恭摺具奏在案嗣據各屬先後稟報均已清查戶口挑選壯丁一律認真舉辦但皆苦於經費無出竭蹶萬分或請撥糧攤派或請就地籌捐議論紛紜莫衷一是不特辦法歧異行之不能經久且恐苛派擾累流弊因之而生是利未見而害先形殊非 朝廷保衛閭閻之意奴才督同司道反覆商酌竊維團練以振民氣保甲以清內奸行之力則遍地皆兵持之久自隨時可用洵屬千古自強之良法尤爲今日難緩之要圖然欲善其事而奉行不懈責其效而經久不渝非酌量籌給經費不可蓋操練犒賞教習薪工暨添製旗幟器械在在均須費用也查滇省隨糧所收夫馬錢文年終通盤計算除各屬坐支及一切應付極力撙節每年約可提銀一萬餘兩又鹽務節省提價案內加徵溢課銀兩奏准留備邊防要需每年設法騰挪亦可提銀三萬餘兩除省城所練人數較多經費亦鉅應由奴才隨時核明支給不准虛糜外計通省八直隸屬七十餘縣州縣以分防要地與廣西界連細越各土司概令分班抽練其邊要重地如建水文山等三十六縣擬每年各發銀五百兩每班練團五百名腹地州縣如易門安寧等四十九縣州縣擬每年各發銀四百兩每班練團四百名分防之最要者如五曹州判等大處擬每年各發銀三百兩每班練團三百名西南沿邊各土司如千崖鎮康等處比於邊要州縣其次則擇其最要者如五曹等處發銀抽練亦如之合計通省所費每年約需銀四萬餘兩而

每班所練可得四萬餘眾自本年爲始三年之後練足五班可得勁旅二十餘萬此款即以各屬所收夫馬錢文坐支其有不敷與不收夫馬錢文之處由省在鹽務溢課項下支給如此辦理費既無須另籌辦公可期核實不惟民間無所擾累有司亦不爲難各屬如有公款能自擴充者亦聽其便但不得藉此招派致生事端至操練之法應卽按照省章官紳不給薪水團丁不給口糧平時尤以守望相助清查盜匪爲第一要義西南沿邊要隘應築碉堡掘挖地營者亦飭酌量緩急次第舉行各種快鎗爲當今利器尤爲邊防要需應於鹽務溢課積存款內先提銀三萬兩購買以後每年酌提銀一萬兩按年分批購置存儲開廣蕩洱各軍裝局以備有事時就近發給目前教練勿用明火銅帽等鎗及刀矛叉棒等件俾免濫費以上各節卽責成各該管道府隨時稽查督率務令各屬竭力講求認真辦理倘敢因循塞責始勤終怠或有侵蝕虛耗情事一經查出立予撤參其實心任事辦有成效者奏請從優獎敘仍由奴才不時派員密查稽其勤惰庶足以明賞罰而示勸懲除弊端而期經久以仰副 深宮殷殷誥誡實事求是之至意得 旨知道了擬辦各節尙屬切實仍著隨時認真督察以期經久無弊○崧蕃奏奴才承准軍機大臣字寄光緒二十四年十二月十五日奉 上諭現在京師制錢短少亟應推廣鼓鑄各直省近年多有開局鑄錢之舉著各督撫一律查照辦理其分兩以每文八分爲準務令銅質精純輪廓完好不得以脆

薄模糊之錢攙雜充數各省已經設局者速即開鑄鼓鑄未經設局者即行查照舊章一體開辦將此鑄錢樣式先行呈覽嗣後仍將鑄造數目按季奏報以備酌量提解務當督飭承辦之員認真辦理毋滋流弊欽此當即欽遵轉行去後茲據署雲南布政使林紹年詳稱查寶雲局鼓鑄制錢前於光緒十六年因招商局辦銅竭蹶迭經前督撫臣奏明一律停辦俟銅斤將來辦有成效再行開鑄鼓鑄業經戶部先行核覆在案欽奉前因查滇省現在開辦各銅廠所出銅斤以之儘數備供京運時虞不敷即使勉力設法開鑄尙恐停鑄待銅按月虛糜經費擬請仍俟銅廠辦有成效再行開辦等情詳請具奏前來奴才覆加查核所陳係屬實情惟現在時事艱難不惟京師制錢短少即滇省亦有短乏之虞奴才現已會商督辦雲南礦務臣唐炯竭力設法調維每年擬勻撥銅十萬斤之譜屆時即督飭藩司開鑄分列鼓鑄另行奏報得旨如所請行○戊申諭軍機大臣等現在時事日艱練兵爲當務之急惟練兵必先籌餉近聞各省奏報大半以入不敷出無力籌餉爲辭不知國家維正之供原有一定欸目此盈彼絀理有固然各省近年以來添設局所至爲繁多又有所設外銷之欸雖部臣不能顧問就使實用實銷絕無浮冒其中豈無不急之費可裁之欸誠能移緩就急專意練兵製械二事何患餉項不充兵威不振各督撫奉到此旨著各就地方情形悉心體察某項可徑行裁撤某項可暫行停緩務須騰出餉項若干以爲練兵製械之

用迅卽詳悉覆奏不得稍有欺飾致干重咎將此諭令知之○袁世凱奏臣於光緒二十一年擬呈督辦
車機處核定練兵營制內有各營遇有徵調每步礮工程隊一營須置隨車糧械官車四十輛馬隊減半
如徵途較遠仍須另支添僱等因在案伏查軍營制每步隊一營計官弁兵夫一千五百五十四員名
礮隊一營一千六百五十一員名工程隊一營一千四十二員名馬隊一營八百九員名遇有開拔每人
須備運五六日行糧每兵須備子彈二百粒計步隊每營糧重一萬二三千斤應需官車十二輛每營正
兵一千八名須備子彈二十萬粒有奇計重一萬二千餘斤亦應需官車十二輛兩共需用官車二十四
輛礮隊工程隊所帶礮彈地雷浮橋等件斤兩尤重連行糧計之亦應需用官車二十四輛又各營兵夫
衣服雜械棚帳各件共計亦有一萬二三千斤應需官車十二輛各營弁隨戰餉項公用各件亦有三
四千斤應需官車四十輛以上步礮工程隊每營各需官車四十輛馬隊減半需用二十輛○所部現有步
隊五營礮隊馬隊各一營工程隊半營總共計需隨營官車二百八十輛前因訓練伊始庫款支絀故未
請欵置辦原期遲辦一年節省餉未敢併於營制致滋耗費上月二十六七八等日遵旨開赴山東
德州一帶操演行軍藉以彈壓匪類保護教民而營內並無隨營官車曾商由沿途各地方官過僱民車
歸營墊發價值而節節遲延極費週折且正值農忙之際覓車既屬甚難而逐站遞換於糧械尤多耗損

設有緩急徵調軍火帳棚等項跟接不上一經貽誤關係匪輕况提督宋慶勳士成兩軍亦各有隨營官車以備不時之需即按照原定營制購辦亦屬有例可循惟是時艱方殷若全數添置則既恐糜費太多若概不籌備又難保軍需無誤於萬不得已之中為權宜設法之計現擬酌減四成先撥六成添置計步礮各營每營置車二十四輛馬隊減半工程半營共置車二十四輛合計七營半總共置車一百六十八輛實已減無可減嗣後遇有戎事再添足全數以符營制查置大車一輛須購騾三匹連置車價值每輛約需銀一百二三十兩之譜以一百六十八輛計之約共需價銀二萬一千餘兩置成後每車需用車夫二名每名月支工食銀三兩共計用夫三百三十六名月應支工食銀一千八兩每車餒養騾二匹每匹月支養乾銀四兩五錢計共用騾五百四匹月應支養乾銀二千二百六十八兩共食乾銀三千二百七十六兩相應籲懇 天恩俯念此項官車為行軍必不可少之需勅下戶部先撥給置辦車輛騾匹價銀二萬一千兩俟置後按月撥給車輛養乾車夫工食共三千二百七十六兩以便徵調而免貽誤出自逾格鴻慈得 旨所請車輛價銀為數太多著准其置辦一半設有軍務應須添置之處再行酌核奏明辦理○庚戌以陸潤庠為內閣學士○以李端遇為都察院左副都御史○辛亥恩澤薩保奏查光緒十五年十月內會典館咨恭頒 欽定輿圖格式限一年期滿測繪全圖附說送館遵於光緒十六年依

限咨送因體例未合准會典館咨駁二十一條據稱須另添委員詳細查測經前任將軍依克唐阿奏請展限並咨調此洋武備學生六人來江辦理嗣因依克唐阿出帥遼瀋調出學生二人所餘四人經前護理將軍增祺改派入營充當鎗礮教習於二十一年正月二十五日附片陳明俟軍務平定再行詳細測繪與圖二十二年正月十六日奴才等附片奏請將工部候補主事屠寄暫留江省總纂與圖先後奉旨照准各在案查奴才未到任以前江省六城與圖惟呼爾一城草圖粗就到任以後令各員合測布特哈一城草圖半就始畢此外齊齊哈爾黑龍江恩爾根呼倫貝爾四城地方遼闊測員四人不敷調遣准圖局總纂主事屠寄等呈請選八旗聰穎西丹十六名責成原在北洋武備學生屠祥奎所夕在局教以三角測量之法於二十三年正月學成卽派屠祥奎等分作四起每起各帶西丹四名分城查測限令一年內竣事屠祥奎測呼倫貝爾張士元測齊齊哈爾劉恩鴻測恩爾根均依限將三城草圖測繪完竣惟單世俊一起出測黑龍江城地面較各城尤爲遼闊江左留駐之五十五旗屯錯在俄界而節章又頒將咸豐八年前江左山川古城一切查繪不得不采入俄境詳細測查至七月底始竣事回省曾經咨明戶部會典館各在案於時各城草圖始全八九兩月因得合攏成徑寸方圖底本再將底本縮成小幅日夜催繕本年正月十五日一律完竣一面騰清一面按底本撰次說表注寫地名或山川脈絡偶有可疑

該委員等未能身到之處主事層層搜羅金礦各圖及通省兌音等處大荒之圖隨時將底本更正故底本尤爲詳確因江省周圍萬餘里處處與俄羅斯內外蒙古毗連誠如館咨圖成可作籌邊之用之說不得不加意詳慎然內地省府州縣以次遞詳圖與表說可以互見江省除呼綏兩廳外並無州縣分圖而各城轄境既廣館格限於尺幅不能詳註特歸十里方圖底本格外考訂詳明一併附清送館以備參考凡爲總圖一副都統城分圖大呼蘭綏化兩廳分圖二黑龍江城新舊轄境最廣折之爲四呼倫貝爾所北袤長折之爲二共十有三幅裝爲十三冊審中外之形勢挈山川之大綱成總圖說一建置沿革折衷正史地志此緊搜諸紀傳審其用兵之跡定其至到之方通譯音以正名訪古蹟而必究凡方式濟西清何秋澣之評是者從之誤者勿錄說山仿伯益之經敘水擬道元之註諸部語解本 欽定三史之譯音中外殊名遵 內府舊圖之正字成大成分圖說六廳圖表二裝成九冊並圖都爲一函又以極漫衡要緊接俄蒙鄂博卡倫新舊繁密細流支阜曲折蜿蜒館頒圖格不及備載別繪徑寸十里方底本圖六十一幅裝成九冊都爲一函而黑龍江全境之圖以成所有光緒二十二年十月初一日以前圖局經費前經依克唐阿於十九年九月初五日奏請於通省官弁俸餉項下准其報効酌辦摺內聲明免其報部核銷奉 旨照准在案此後經費經奴才等於二十二年十一月初七日奏請援照湖北湖南江西各省成

案將二十年以後呼綏兩屬浮多熟田新增徵進租款項下撥節動用作正開支奉 旨照准當經咨明戶部即於十月初一日起支亦在案計自接辦至告成之日止共支經費銀四萬三千三百七十一兩八錢六分二釐比較湖北經費尙省用銀一萬二千餘兩現在全圖告竣一面咨送會典館一面飭局員清理文卷備四月底將局裁撤截清款項造冊報部核銷其底圖六十一幅應詳校付之石印以便分別咨送軍機處總理衙門兵部及本省地方各衙門以備稽核而存掌故查江省輿圖自光緒十五年開辦中間作輟更易數手迄無成效自二十二年五月奴才等將前 欽派大員隨員工部候補主事塔寄奏留接辦該主事即與提調佐領迎福細商始創選教西丹分城查測之議定常川駐局刻畧課程之章圖事始有把握至於綜纂說表始終一手經理實爲勞怨不辭心力俱瘁俟會典館覆核後容奴才等擇其尤爲出力者援陝西湖北安徽等省成案照尋常勞績酌保文武各數員不敢冒濫得 旨著准其擇尤酌保毋許冒濫○恩澤奏光緒二十二年十一月初七日奴才等奏請接辦輿圖摺內聲明圖既未成說表理難虛構恐纂校人員坐待圖成曠廢歲月一面飭將古今建置沿革詳實考訂凡近數十年中疆域之縮縮官司之廢置練軍防勇之變更旗屯民田之墾闢一切地方政治依類編纂俟集成進志現在全圖告竣其沿革度疆域山形水道城站古蹟鄂博卡倫不難按圖成說惟自康熙年間設官駐兵以來

一切檔案多係 國書必須詳細檢核譯成漢文方便編輯江省本無專志盛京通志所附事蹟至爲簡略而方式瀋龍沙紀略西清黑龍江外紀徐宗衡龍江述略諸書皆私藏著述檢閱猶需時日編纂尙待多才條理既繁倉卒斷難集事現在國局將撤理應截款報銷若另設一局經費又苦支絀奴才等再四籌思只可暫將志書停辦一面飭知滿洲編譯人員將歷年檔案依類查檢隨時譯議一俟舊案編譯略備造成底冊屆時再請撥款派員接辦似爲妥實報聞○壬子諭軍機大臣等鄧華熙奏安徽省漕糧改徵本色驟難辦運請暫循舊折徵一摺所奏因屬實情惟京城糧缺價昂旗兵困苦非多徵本色起運無以濟兵食而實倉儲現在皖省歲徵熟田漕米十五六萬石係屬全數折徵著自本年冬漕起先行改徵本色一半妥籌運京仍隨時體察地方情形設法辦理以期全數規復本色將此諭令知之○劉坤一奏前准總理衙門電開據總稅務司申請在於江甯設關徵稅與修改長江新章同日舉辦經臣擬派江南鹽巡道兼充金陵關監督並請頒給關防奏蒙 恩准在案嗣因稅司尙未派定電商展期茲據該關監督詳稱稅務司安格聯業已到省相度儀鳳門外下關地方設關最便現暫就原有官房躉船爲監督稅司人等辦公之所於本年三月二十二日開關驗貨徵稅照章辦理並由江海關照會駐滬各國領事轉飭商民知照等情詳請奏咨前來伏查金陵關介於蕪湖鎮江之中進口貨無非從鄰關分出稅項恐難

驟增所有關署貨廠稅卡巡船及關署辦公經費須俟試辦數月方能詳細估計至監督關防尚未頒發
來甯現在該關一切文移單照等件應暫用江南總巡道關防以昭信守得 旨該衙門知道○前署禮
部右侍郎吳廷芬在總理各國事務衙門行走○甲寅工部尙書錢應溥以病免○諭奕劻等奏神機營
開花礮隊兵廠藥庫不戒於火轟傷兵弁震塌房屋分別辦理一摺本月初二日辰刻神機營開花礮隊
隊長等在庫內包裹火藥失慎致將廠內兵房全行震壞並傷斃弁兵所有轟斃之隊長郝慎長等六名
及被傷之隊兵連陞等情殊可憫著從優酌給卹款及調治銀兩以示體恤至該廠藥庫失慎雖屬猝不
及防惟操演公所存儲火藥不應過多致有疎失該隊管帶楊操營總等官均著查取職名交部照例
處管營王大臣著交該衙門分別議處又據步軍統領衙門奏該兵廠失慎情形但稱被轟房間人口一
時礙難清查未將如何詳細飭查緣由聲敘殊屬含混究竟鄰近各住戶被震房屋倒塌若干有無壓斃
人口應行撫卹之處仍著該衙門逐一查明迅速具奏○乙卯以徐樹鉉爲工部尙書徐用儀爲都察院
左都御史○以徐會澧爲吏部左侍郎許景澄爲吏部右侍郎楊儒爲工部左侍郎袁世凱爲工部右侍
郎○丙辰諭前據德壽奏本章公文接遞遲延請飭查究爲經諭令直隸等省嚴飭逐站挨查茲據裕祿
奏稱直隸縣馬夫接遞江蘇本章公文取有回照該省提塘稱係假造各據一詞請交部審辦等語著裕

祿卽將全案人證咨送刑部由該部就近傳同江蘇提塘質究確情照例懲辦○文興營昌奏查接管卷內前將軍依克唐阿遵旨開辦奉天礦務近年惟金礦一項微有起色計自光緒二十二年三月試辦之日起至二十四年十二月止所設鳳遼安東海城鐵嶺通化海龍錦縣各礦局共解到課金銘成九遞至五四各色金條三十二條半計重市平三百二十四兩零五分又解到課金金沙及條重市平三十五兩七錢八分三釐二毫又通化礦局解到課金易銀市平銀七千兩查此款原奏一萬兩該局以所交課金作抵市平銀三千兩實解到市平銀七千兩另欸存儲又副都統榮和開辦鳳遼安東礦局遵照奏案由鹽釐項下籌墊經費市平銀二千零二兩五錢五分三釐以該局所交課金照市價抵算雖無贏餘尙未虧折應於二十五年分鹽釐欸內列銷合併聲明下戶部知之○庚申李俊奏礦務爲時政切要之端迭奉諭旨垂詢亟應核實辦理以裕國帑而盡地利查前督臣鹿傳霖開辦冕寧金礦極意經營委道員賴鶴年總司其事並由賴鶴年薦知府徐麟光總辦商股同知唐球爲礦師原訂官商合辦共本三十萬兩官商各半前已用去官本七萬九千餘兩本年又據請撥官欸添購電氣鑽機因係開礦要需若不購置勢虞停頓不得已任土釐項下暫撥官本銀二萬兩俾得趕緊購辦惟查賴鶴年等先後稟詳督稱辦有成效而採取之金僅二百二十餘兩奴才密加詢訪道員曹繩前奏鹿傳霖飭往勘驗礦質甚佳川

省官紳亦收情此礦實爲得地果能認真辦理何以數年之久未見礦利賴鶴年等總以官本短少機器不足爲詞而是否用人得當事核實尙難盡信現奉藩司王之春督辦並委知府李壽田提調局務會同賴鶴年等將現在情形澈底清查一面督飭在工員役切實開採總以礦旺金多爲憑不得虛言收效徒糜官本一面查以前有無弊混再行詳細分別辦理得旨知道了即著確切查明有無弊混詳請具奏○辛酉大祀地於方澤道海神祭代行禮○松壽奏江西練習洋操需用彈子經前護撫翁曾桂擬飭上海機器局向洋行定購製造上懸鎗機器兩副約需銀四萬二千餘兩附片陳明在案臣蒞任後准兩江督臣劉坤一咨欽奉九月初二日 上諭製造鎗礮爲當今第一要著惟各省財力不齊自應就原有局廠切實擴充以備鄰近各省就近購用等因欽此又據上海機器局電稟以浙西皖三省軍火歸上海金陵兩局專辦以便分途取運一竊思購辦機器必需度地建廠鳩工庀材集款先已浩繁一經開廠則僱募工匠遣派委員又需增添常年經費而廠中製造所用之銅鐵物料仍需購自外洋由滬轉運統而計之設立一廠所費甚鉅江西新練洋操勇丁僅三千餘名需用鎗彈本可核計際此時局艱難庫款支絀似不必故事鋪張總期實事求是況上海至江西由長江轉運一水可達臣當隨時查驗各練軍需用彈子等項先期向滬局定造總宜從寬購儲以備緩急所議需用機器製造之處應請

暫緩購辦下部知之○諭軍機大臣等剛毅奏長江防務緊要水師兵單不敷分布請飭沿江五省督撫不分畛域節節設防以期首尾相應等語長江江面遼闊港汊紛歧現值多事之秋亟宜加意嚴防以杜窺伺著劉坤一張之洞鄧華熙松壽于蔭霖俞廉三會同妥商各派得力將領扼要駐紮嚴密設防該督撫等務當不分畛域聯絡一氣庶幾緩急可恃仍籌商布置情形先行具奏將此各諭令知之○癸亥荆州將軍祥亨以病免○甲子以濟潭為荆州將軍常恩為杭州將軍○鄧華熙奏上承准軍機大臣字寄光緒二十五年正月十七日奉 上諭現在京師錢價日昂現錢亦短以致市肆蕭條商民俱困推原其故皆由銀錢日絀不敷周轉使然亟應認真設法以圖補救嗣後著各省督撫將應解部庫各款一律歸解寶銀赴京交納其沿江沿海及近畿各省督撫於應解部庫各銀款內並著搭解制錢一成以資挹注等因欽此遵 旨寄信到臣當飭藩司移會蕪湖鳳陽兩關道一體欽遵辦理去後茲據布政使湯壽銘詳稱安徽省司關各庫每年應解部庫各款係勘庫存實銀委員領解赴部向不經由號商以票匯兌自應循舊辦理應解部庫各銀款內亦應懍遵 諭旨籌搭制錢以便京師商民藉資挹注惟安徽省向來未經設局鼓鑄錢文官民行用所需皆由各省貿易而來近年到處錢絀已乏來源本境所存因之日少一日司關各庫既不允收制錢鑄金雖銀錢並收而商人因市少現錢往往以錢折銀完納准北各卡於創

設之初均係收錢委員循照舊章收銀而仍以錢數列報今若將應解部庫各銀款按搭解一成制錢核計約需五六萬串爲數既鉅籌集維艱且錢質笨重數倍於銀應需運各費比銀亦加數倍查光緒十三年間奉飭搭解釐金制錢五萬串當時市面尚未如此之隘錢價亦未如此之昂因解費在本款內酌除虧折過多卽行停止現在錢價增昂由於缺乏臣思有以補助錢源之竭是以於上年奏明籌借款項購置機器鑄造大小銀圓與錢質相輔而行市面雖已流通稍紓民困而錢荒如故若再於京師搭解制錢五六萬串非特搜羅不易卽能如數解京而安徽省存錢愈少價必更增有礙小民生計且訪查各屬銅價亦倍於前倘欲開鑄鑄錢以補不足又耗折甚重耗款亦無所出擬將應解部庫各款仍舊統以寶銀解部交納免搭制錢等情並聲明蕪鳳兩關道移覆該司臬案詳請奏咨前來臣覆加察核委係實在情形惟有仰懇 天恩俯念安徽省制錢缺少周轉不敷應解部庫銀內准免籌措搭解以紓物力得 旨知道了一俟錢市流通仍遵前旨按成搭解○乙丑魏光燾奏查陝省創建武備學堂經 於上年八月奏明借地開辦隨後成總辦提調督同教習認真訓練並飭一面籌款興修學堂擴充學生名額安定章程在案臣維武備學堂之設闕育將才用儲異日折衝之選奈中民情純樸風氣未開較之沿江沿海耳濡目染者雖有先後難易之不同而使教課時勤循習勿懈則取材精而經費又省用功約而收效彌

宏其於儲才備武之道原歸一致現查學堂興修早竣總分教習已由新建陸軍延調前來本年正月移入開學講堂操場分時嚴核規模視昔已充功課較前亦備惟是學堂總章迄未准部頒發津鄂各處雖有規程而陝省學爲新創地處僻隅或限於財用之未充或苦於生徒之不廣如必一一墨守終嫌徒爲虛名且學堂規制甫開非明定畫一章程無以稽資經久經督飭司道參酌津鄂兩學堂舊章擬簡明章程以資遵守至學堂所需經費詳考中外辦法以武視文歲費尤鉅茲就陝省銀絀情形現時辦理局面約略核算切實撙節每歲仍需銀一萬二千餘兩查照前次奏案常年在於裁減兵丁節省糧料變價項下開支當與兩司總辦督飭提調隨時糾督考察務期教學無曠造就日宏以仰副朝廷作育將才修明武備之至意得旨知道了卽著按照章程認真考課以育將才毋得虛糜經費日久致成具文○內寅諭前據溥崑等奏孝陵山七孔橋南至一孔橋一帶地方並景陵大碑亭附近及裕陵一孔橋迤南松樹間有生蟲之處當經諭令溥崑等督飭土緊搜捕現在情形究竟若何實深原系著派載樸前往敬謹詳細查明毋稍大意○諭御史余誠格奏民間昭信股票請將領息移獎應從民便一摺前因內外臣工認繳昭信股票稟請報効業經降旨准其報効飭部照數給獎其紳商士民認繳之項仍令按原議計分季還本茲據奏稱民間昭信股票有情殷報効不願領本息者准其繳票按給獎敘其

願領本息者仍照原定章程辦理等語。藩戶部咨行各督撫體察地方情形分別辦理。總期各從其便。不得稍有抑勒致滋紛擾。○寶璽將軍鍾泰以病免。○戊辰劉坤一等奏江蘇省沿江沿海各屬沙地坍塌。靡常利弊叢雜。前經部議定十年一丈。蘇屬自上屆清丈後至今已歷十餘年。各屬沙洲林立。新漲灘地甚多。徒爲沙棍盜射。漸佔從中婪索。當此時局艱危。度支匱乏。如此正供鉅款。豈容奸竄隱欺。辦理清丈實爲當務之急。先經札委候補道錢志澄會同蘇藩司聶緝契酌議章程詳辦。去後茲據該司道會詳參照上年成案議定章程以清理灘坍爲第一關鍵。漲者卽令補繳價息。准其承買給照執業。坍者卽予勘明請豁免賠種之累。并將控爭漲灘各案由縣委各員逐一勘訊斷結。其有蓄積田地變成膏腴者分別轉漕以杜避重就輕之弊。員董差役薪工等費概動公項不准向沙民索取分文以免擾累。詳請核示前來查核該司道所擬章程洵足以除積弊而恤民隱實於國計民生兩有裨益。下部知之。○己巳裕祥等奏前奉 上諭各省駐防生齒日繁聞散中不乏精壯之士並著該將軍等各就本處情形挑選若干教練成營以資捍衛所需。嗣頃應與該省督撫藩司妥籌協撥奏明辦理等因。欽此。奴才等遵奉之下仰見 朝廷於整飭武備之中仍寓體恤旗兵之意。凡在臣僕莫不歡欣鼓舞共戴生成。奴才等遵與督撫奎俊暨藩司王之春會商雖餉力極其艱難總應設法騰挪查成都駐防兵丁除現食糧者不計

外其閒散尙有數千丁不乏精壯之士奴才等遵 旨詳細熟商若挑練太重不特餉項難籌抑且將弁難選卽教習亦一時不敷與其多而寡效何如少而專精茲擬於閒散中挑取年壯再在年壯中挑取身強復於身強中挑取靈捷以四百人爲半編成一營具薪糧營制查照督 臣新練之軍酌量核減計一年餉需約在二萬兩之內自本年五月起卽行挑練惟是駐防積習平居各有室家不歸營盤難免游惰今奉 特旨挑練不容習故蹈常且同一練軍卽宜同一營制以期血脈貫通不准各營歧視方爲得體卽由督 臣選派教習來營所操陣法與各營一式無異於旗營地段擇寬敞之區築立營壘操場按日訓練所有將弁兵丁概在營內住宿平時不許私自出營庶可杜流弊而實造就現在陸續挑選將兵一俟成軍之日另編檔冊倘入營後爲將者敢染防營習氣卽從嚴參辦爲兵者不守營規及不遵式習練均照營章分別輕重革懲斷不容有一名濫廁行間此奴才等現在籌商之大略情形也此外未盡事宜及成軍後如何情形一切詳細章程容再陳奏得 旨著卽認真挑練將商定章程奏明辦理○庚午文興管 奏上年十月十八日准戶部咨會議遵 旨詳查京旗徙戶開屯計口授田各節查照成案酌擬辦法 神單具奏一摺單一分於光緒二十四年九月三十日具奏奉 上諭奕劻等會奏遵議京旗徙戶開屯 查照成案酌擬辦法開單呈覽一摺近年八旗生齒日繁生計日感從前所籌京旗移屯之法本屬切實

可行而應接續舉辦銀邊屯各事宜爲京旗妥籌久遠之計該王大臣等所擬辦法各條尙爲詳備惟茲事重大經營伊始事理極爲紛繁必慮始闢終行之無弊方爲一勞永逸之舉著依克唐阿延茂恩澤永德裕祿色楞額祥麟等按照單開各該處荒地可移京旗屯墾者實有若干畝並著八旗都統迅將各該旗人丁願到屯耕種者查明實在數目奏明請旨辦理原摺單均著鈔給閱看將此各諭令知之欽此計單開 盛京之大凌河養恩牧大圍場除前已放荒屯墾外究竟尙有閒曠地畝若干可以開墾耕種迅即詳細奏報此外各屬凡係地曠人稀壤沃泉甘足供旗丁屯種者應一併指明地方查清畝數報部核辦等因咨照前來當經依克唐阿分飭各屬勘查未據覆齊因病出缺奴才等接任後博訪周諮細加籌度伏查養恩牧荒田計已放過生熟地六十一萬八千八百二十四畝一分尙有餘荒八萬九千六百四十九畝餘地三萬五千三百一十九畝餘荒一項作爲蒙漢雜居牧放厥餘地則飭令蒙古翼長撫恤無告窮民均經奏明有案大圍場前經奏准招民開墾四十五圍其餘四十圍依舊封禁現此四十圍業奉 上諭安插金州租界內遷徙旗民雖丈放伊始尙覺人浮於地惟大凌河一處悉屬草甸從未開墾然牧政攸關前經戶部會同上駟院議奏奉 旨仍行封禁當此 國家整飭武備未便改牧爲耕此養恩牧大圍場並無荒地及大凌河未能墾荒之情形也奴才等復以時關京旗生計敢不慎重周詳以

仰副 朝廷加惠旗僕至意爰通飭各屬詳查現據陸續報明均無閒曠荒地可以遷徙京旗蓋奉天昌圖一府本屬蒙荒借以養民已無餘地東邊通懷兩屬與海龍一屬雖係新荒初闢早經開墾成熟丈報升科並無成片荒地可以屯墾各屬所報但無荒地自係實情與奴才等所訪均屬相符除咨部查照外理合恭摺覆陳下部知之○壬申諭軍機大臣等四川甘肅陝西山西等省俱可由陸路直達京師運餉較便各該省藩庫除本省開支暨解京協各餉外庫儲是否尚有盈餘著該督撫查明實在數目具奏將此諭令知之○癸酉諭總管內務府大臣奏監生門定德稟請回旗振情代奏一摺門定德經前護理廣州將軍興廉保薦來京隨同太醫院請脈半年有餘現在朕躬尙待調理該監生何得遽請回旗所請著不准行總管內務府大臣率行代奏殊屬冒昧著傳旨申斥○甲戌諭禮部具題萬壽禮儀一本所有本年六月萬壽著在勤政殿行禮停止筵宴如遇兩在德慶門門宴下行禮○張之洞于該奏奉本年正月奉准軍機大臣字寄光緒二十五年正月十二日奉 上諭練兵爲當今要務迭經諭令各省將軍督撫各就本省餉力妥定章程認真辦理該將軍督撫等受恩深重自當共體時艱力圖振作迅速舉行現在某省實能籌餉若干練兵幾營何人統率未據切實奏到著各督撫懷遵歷次諭旨迅速妥議限一月內迅即覆奏至各省駐防生齒日繁開散中不乏精壯之士並著各將軍等各就本處情形挑選若干

營練成營以資捍衛所需餉銀應與各該省督撫藩司妥籌協撥奏明辦理用副朝廷講求武備諄諄詔諭之意將此由四百里各諭令知之等因欽此竊思自強以練兵爲最要練兵以籌餉爲最先湖北水陸四衝今日又爲南北鐵路之樞紐華洋雜處會匪滋多外國通商凡鐵路扼要之所必以重兵護之自非有大枝勁旅不足振軍威而弭隱患荆州爲駐防重鎮旗營挑練勁兵亦爲當務之急茲奉 旨飭令迅速軍自應遵辦理查鄂省於光緒十年籌辦江防署督臣卞寶第奏請將湘鄂行銷之川鹽准鹽每斤加價二文前經奉定爲銷鹽廠專款二十年戶部議覆編修張百熙籌餉各條一摺復奉准每斤加價二文旋經戶部指撥爲添還四國洋債專款雖經一再加然離商之所輸將實食戶之所攤派散之全省於民間尙無大累擬仍援案辦理將行銷鄂省川鹽准鹽每斤均加二文統計此項所入每年約可得銀十六萬兩湖北擬即添練新軍勇營一千人卽於此款撥銀十二萬兩作爲此項軍餉及洋教習薪費軍火營房器具之需並補足從前改練洋操餉項下不敷之處以四萬兩撥作荆州挑練駐防閒散旗兵新餉並軍火雜項在內其詳細籌畫辦法另由臣等會同將軍臣祥亨專摺奏陳又查鄂省各營改練洋操所費銀兩張之洞前奏每歲不敷銀八千兩係指洋操餉而言惟既習洋操則教習之薪水以及軍械藥料營內學堂圖書測繪儀器工程雷電體操喉刺一切各種器具需費浩繁若各項不備則仍是

有名無實故此項爲數頗鉅而待用最急關繫甚重萬萬不能從省必須於此項鹽斤加價內籌出此款查湖南近於上年十二月奏請於淮鹽每斤加價三文共銀十餘萬兩作爲挑練勁字營新軍專餉奉旨允准在案湖北事同一律自可援照辦理而加湖北民間食鹽之價卽以練湖北本省之兵此乃爲地方衛民擇惠計情理既屬允協辦理自無窒礙方今時局日艱所最急者莫如練兵一事 明諭遞降至再至三寶爲 國家綢繆禦侮之至計此次籌餉在湖北各屬行銷川淮鹽內加價仍係本省之捐爲本省之餉與現奉 諭旨就本省餉力辦理尙屬相符此以外別無良策如蒙 俞允應卽由臣等咨明兩江四川督臣查明辦理得 旨如所請行○乙亥欽奉 慈禧端佑康頤昭豫莊誠壽恭欽獻崇熙皇太后懿旨宋慶奏病體難支懇恩賞假就醫一摺宋慶老成宿將卓著勳勞現在年屆八旬久病未痊實深厚系前已降旨賞假並發給人參活絡并俾資調攝著再頒給各色暑藥四匣准其於近畿一帶擇便就醫安心調理所有武衛左軍營移印著交馬玉崑暫行代理該軍訓練多年素稱勁旅馬玉崑代統之後一切仍當恪守成規隨時稟商宋慶認真經理不可任意更張亦不可稍涉諉卸用副朝廷整軍經武至意○文興等奏查前奉 寄諭吉林黑龍江採選精壯若干認真訓練其所需餉銀能否就地籌畫之處著依克唐阿延茂恩澤會同妥議具奏欽此當經依克唐阿以本省所餘練餉悉已撥練仁育兩軍旋

與延茂恩澤彼此電商迄無成議未及具奏因病出缺奴才等現將糧餉清查實無餘款可以另練精壯
旗丁惟查盛京八營本由八旗挑選曾經依克唐阿汰弱留強若再認真訓練不患不成勁旅得 旨知
道了卽著認真訓練毋稍懈弛○奎俊奏時局多艱練兵爲要迭奉 上諭飭令認真舉辦奴才遵卽會
商將軍臣裕祿署提臣夏毓秀謹就川省現在營勇餉項悉心詳籌查川省僻處偏隅與沿江沿海省分
情形迥別防營勇丁向習中國陣法從未講練洋操此時訓練非難而改練爲難通省防勇三十餘營約
計勇丁一萬三千餘名全年餉銀約需六十餘萬兩平日已苦餉絀再增新練之軍則餉愈絀而自今時
勢非練兵無以自強然必聚勇歸營乃能訓練今川營佈置如南路之馬邊雷波峨邊各處逼近夷寨隘
口林立駐防達字等營分紮要隘去冬調赴川東夷匪卽於冬春之間大股出巢分路肆擾急調各營回
防分別剿撫始稍斂跡此南路防營難以調操如西路之松潘越嶲及打箭爐各土司與藏地毗連險遠
之區營勇換防已苦跋涉更難訓練又如官運鹽岸沿河一千餘里分紮安定各營岸地私梟充斥兼之
井鹽丁夫船戶水手人數衆多良莠不齊勇力僅敷鎮懾鹽務爲京川協鄰各餉命脈營勇斷難離防合
操而東川善後留防彈壓各營一時亦難抽動以上營勇只可各就防所隨時練習此外惟腹地各營可
以合練而薪糧過薄將弁勇丁不足以贍身家以致缺額餉餉百弊叢生今認真訓練非優加薪糧難望

起色川省歲入鹽課稅釐合計只有此數而連奉部指撥各款爲數甚鉅日益月增以致入不敷出若再增籌鉅餉並日加整練實屬力有不逮卽如上年新募湘勇團勇除已遣撤外尙存七營正苦無餉取餉裁併何能陡增練軍之需再四籌維只有逐漸改練之法汰除疲弱卽以所汰之餉增給新練之軍已擬先練十營每營四百人酌加薪糧不敢驟循直隸新軍及江南自強軍餉章僅仿照湘軍酌量辦理於增餉之中仍存節省之計每年約需餉銀二十七萬餘兩較之舊章約增銀七萬餘兩所練十營卽自本年五月起改習洋操川省上年秋間開辦武備學堂請到教習數人奴才由蘇來川時卽注意練兵又於江南自強軍內選帶教習十二人數月以來營中學生經奴才躬親校閱約有數十名可資造就一面學習一面分配各營以番訓練所須鎗礮子藥奴才上年由蘇帶川各項以之勻發各營隨後再行添購並京省城內外將礮有營壘展拓修葺並關操場分歸提臣夏毓秀並委署重慶鎮總兵初發祥營務處道員黃立榮等統領各營認真訓練名曰威遠軍並於各營內挑選得力營官嚴定軍律切實辦理務期成爲勁旅用備徵調而尤以懷遵訓諭痛除缺額以便責成各營駐紮處所認真常用操演他時有餉可籌教習足敷分布再行陸續改習洋操總期練成萬人庶幾緩急可恃奴才與裕祿夏毓秀通盤籌畫並督同藩司王之霖迭次籌商意見相同嗣後惟有會同督飭不時校閱認真考察自願受恩深重責任匪

輕況當 宵旰憂勤力圖自強之際奴才稍有大良亦應殫精竭慮力加振作萬不敢徒託空言上負
訓諭諄諄至意得 旨知道了 謹即督飭認真訓練仍隨時設法籌餉增募以備緩急○奎俊奏積穀爲
備荒要政關係民生根本迭奉 諭旨飭辦更當切實舉行伏查川省積穀經前督臣丁寶楨妥定章程
每糧戶收穀百石出穀一石以次遞推百分捐一不許顆粒苛派歷年以來儲蓄甚富光緒二十二年川
東一帶被災各屬飢民得不失所實賴提穀賑濟之力居多奴才到任後細加體察川中由多田少生齒
過繁稍有歉收卽慮乏食整頓儲穀尤爲切要當卽分咨各屬州縣將常年吐濟各倉原額積穀若干因
公動用若干曾否照數解庫澈底清查驗勘虛實先後據各該屬稟報有積存倉米二萬餘石及萬餘石
者至少亦數千石間有因川東上年被災開倉平糶後穀價昂貴一時尙未解還亦經飭令速行買補實
存在倉偶遇偏災足資救急惟須經理得人方可永遠保守奴才復通行嚴飭各牧令務選公正殷實紳
耆妥爲經營不准假手書吏以杜侵漁仍責成該地方官認真盤查如有稍憚煩瑣視爲具文或有虧挪
情弊定卽嚴辦著賠藉示懲戒一面預爲籌取本年秋成之後查照向章實力勸辦一俟續有成數各倉
豐盈再行詳細查報總期逐漸擴充有備無患以仰副 朝廷念切民依足食收荒至意得 旨著依欽
後一律照章勸辦並將通省實存數目詳晰奏報○奎俊奏川省訓練保甲經前督臣鹿傳霖在省設局

選派官紳督同各屬舉辦當經核定章程先清戶口次擇團首挑取壯丁輪流防夜無事則散歸有事則應援聯絡聲勢稽查匪類又於團丁之中再加挑選作為練勇視地方之大小經費之多寡以定練勇數目一縣之中多或百人少或六十或四十人並選公正紳耆二人為練正練副製備旗幟器械延聘教習逐日操練由地方官隨時校閱俟操練純熟仍令歸農另行挑練吏番替換欲期日久民盡為兵團練之費或由紳商捐集或提地方公款官督紳辦不經吏胥之手遇有盜案會同兵役緝捕前署督臣恭壽曾飭屬加增練勇大縣二百四十人中縣一百六十人小縣一百人又經前護督臣文光通行照辦均經奏報在案數年以來漸收實效因川省盜賊過多劫掠拉擄民間受害已深是以編甲聯團咸知守望相助之益而通省中尤以成都府知府劉心源所辦最為得法團民樂為之用確能聯絡響應堵截追捕屢獲要匪成效昭然又如上年川東教案匪股肆出凡團勇得力之區匪不能擾且經藩司王之春飭調隨同官軍剿辦頗為兵力之助奴才入川之初沿途查閱考察嗣奉 上諭加意講求蒸蒸日上起色近來劫掠拉擄之案較前頗少但能久而不懈可期日益精強所慮者團首用非其人難免藉詞斂費侵擾滋弊甚至嚮教通匪其漸不可不防是在地方官平日留心查察證以鄉評妥慎選用奴才每於批行稟牘及牧令進見時詰誡諄諄所期任用得人自可杜絕流弊惟有始終振奮切實推行維已成之基收實用之

效庶仰慰 朝廷衛民靖匪寓兵於農至意得 旨知道了著卽切實辦理仍嚴防流弊爲要

六月丁丑朔 上御勤政殿議國使臣薩爾瓦觀見○戊寅兩○己卯諭倉場侍郎長萃等及稽察儲濟

倉御史閻錫齡奏兵丁領米遲延請旨飭催各一摺據稱鑲白旗漢軍應領恩賞米石據該旗副都統蘇
卿等到倉看驗米樣正在運領經兵丁多人兩次打散領米車輛迄未領出嗣准該倉片稱兵丁等意
欲不領和米又鑲白旗包衣經該倉三次片傳延不赴領各等語所有恩賞米石前經明降諭旨一律照
章稟和分成搭放各旗均已承領獨鑲白旗包衣三次片傳不到其鑲白旗漢軍兵丁意欲不領和米甚
至屢次打散車輛殊屬不成事體著該旗都統等遵照部章剴切曉諭迅卽定期往領並查明滋事兵丁
嚴拿懲辦以儆刁風嗣後各旗都統等赴倉領米均著嚴飭參佐等傳諭弁兵懷遵約束如敢藉端聚眾
抗擾卽著嚴拿送部從重治罪毋稍姑容亦不准以陳朽不堪之米攙雜充數致誤兵糈○成都將軍裕
祥以病免○庚辰先是軍機大臣和碩親王世鐸等奏光緒二十五年四月二十八日內閣奉 上諭
從來練兵籌餉事理本屬相因近日朝廷整頓庶務於籌餉一事尤在所當急各省關稅釐金鹽課等項
取之於民者歲有常經但使各督撫認真整頓裁汰陋規剔除中飽事事涓滴歸公何患餉源不濟無如
封疆大吏瞻徇情面不能力祛因循積習以致委員司巡人等窟穴其間種種侵欺難以枚舉積弊至此

若不認真革除日復一日將復何所底止著大學士軍機大臣六部九卿將各省關稅釐金鹽課詳加查核應如何杜塞漏卮裨益餉項總期朝廷不加取於民而國用藉資挹注以維大局而濟時艱至各部院堂官如有洞悉各省情形實在可資整頓者不妨各抒所見用備採擇務須坐言即可起行不得以空文敷衍了事欽此臣等竊維國家財賦之源自地丁漕糧而外以關稅釐金鹽課三項收數爲最鉅而徵多報少不實不盡亦以三項積弊爲最深釐關稅而言洋稅按結奏報歷年徵收不相上下而常稅則較從前定額大有懸殊卽著名之津海關江海關粵海揚州等關缺分最優亦年復一年毫無起色每屆期滿該監督總以洋貨侵佔常稅短收爲詞督撫卽據以入告豈知洋關歸稅務司經理關道不過綜其大綱尙能諸事核實管收除存朗若列星常關概自我操轉成弊釐積習相沿牢不可破而常關稅務大半包徵包解所徵貨物與釐卡略同何以收數遠遜尤可異者正額既徵不足數盈餘亦收不如前而歷任關道監督各員率多坐擁厚資其爲肥己營私概可想見又就釐金而言其弊在於局卡太密委員過多不免虛糜薪水而弊之尤甚者則由於司巡之得賄賣放局員之侵蝕分肥以及留難商貨收多報少捏造票根大頭小尾種種弊端不勝枚舉卽間有數省嚴定比較之法亦似稍有把握卒之釐金短收不過傳委記過其指名奏參勒限賠補者其屬寥寥總局之於各卡固無不聲氣潛通督撫之於關員亦藉口

不爲已甚即使縱微各員應顧者成亦莫不各留餘美縱比較無虧而利之入私室者恐不少也又竊
鹽課而冒私銷之弊由於私販而藉緝私之名以爲放私之計其弊更無從究詰蓋奸商重包夾帶私梟
結黨成羣尚可設法稽察派勇彈壓若私梟與巡丁互相勾通奸商恃劣弁爲之包庇則私課偷漏將不
可勝計而且場鹽買賣鹽斤各省均無定例鹽入商手尙須抽收鹽釐於是乎鹽商藉口成本過重稟明
各口岸督銷委員隨時加價獲利倍從商力似可大紓何以民間既苦食鹽之貴鹽商亦復疲困不支究
竟除去釐稅若干其盈餘之項作何著落如緝私經費督銷局員浮濫開銷漫無限制豈無可以裁減停
撤之處以上三項弊端大小之不同前後在事各員亦豈皆不等而所謂陋規中飽者積有歲年外間幾
視爲應得之款等詳加查核證以素所見聞而知其大略如此然總以此次諭旨所指陋規中飽爲
足以洞病疾而燭隱情誠使臣下人人仰體聖意精潔自矢事事消滴歸公無不裁汰之陋規無不剔
除之中飽而款目之爲多爲寡事體之孰重孰輕地方之肥瘠不同今昔之情形各異非身當其境不能
纖悉靡遺卽如近年前盛京將軍依克唐阿之於東邊稅釐裁革陋規除中飽悉令化私爲公驟增常
年進款四十餘萬兩其經營籌畫不惟聖明所洞鑒當亦各省所周知現值洋債困於外軍需耗於內
朝廷肝食日昃不遑非籌餉不足以救時非除弊亦難言籌餉臣等目覩時艱同深焦灼而財賦之區

實筭之各省釐剔之責必屬之疆臣應請飭下各該將軍督撫激發天良不辭勞怨整躬率屬澈底清查於關稅釐金兩項責成各關監督並原局司道等員鹽課一項責成運司及廠廳各員將一切收數和盤託出由該督撫詳細勾稽或遞派廉正勤樸之員認真經理第扶根株究覈裁除陋規中飽之數若干應行提歸公用之數若干核定章程專案奏報一面將臣等此次指查各節窮源委統限於三箇月內一併據實覆奏斷不准容言搪塞多方諉卸致洋債無可籌還軍情難於接濟更請明降諭旨嚴飭各省將軍督撫開誠布公剴切開導大小各員咸曉然於朝廷實事求是並非取盡錙銖止在力除弊竇如能不欺不隱解其私蠹還我公帑不但不追究既往並當酌盈劑虛不使其辦公竭蹶其各省將軍督撫果能破除情面認真查辦積成鉅款大有裨於餉需朝廷無不特沛恩施從優議賞令天下知勸倘仍瞻徇情面絕無補於時艱亦即擇尤從重議罰令天下知懲庶幾法立令行不至視為具文毫無實濟此又臣等意見相同不敢不合詞上陳者也嗣大學士徐桐內閣學士準良光祿寺卿袁利內閣侍讀學士高燾會翰林院侍講學士貽穀光祿寺少卿張仲忻單銜具奏各抒所見上諭著軍機大臣大學士六部九卿會同妥議具奏至是軍機大臣和碩禮親王世鐸等奏伏查上次會議整頓稅釐鹽課業經臣等集議上聞此次徐桐等敬陳管見或推廣於前奉諭旨之外補會議所未及或仍就關稅釐金

鹽課三項請分別省分大小派令增解釐餉若干或專就釐金一項請改訂章程酌加整頓或請照現在
磅價核估洋關貨值增則抽數自增或請專辦礦務鐵路多則礦利自出或請將各省釐金募能增額課
之紳商包辦等謹按照各原奏參以現在時勢並各省情形條分縷晰敬爲我 皇太后 皇上陳之
如輪船電綫鐵路礦務四項據大學士徐桐奏招商局規模日拓與太古怡和洋行相埒電綫布滿二十
一行省獲利不貲京津鐵路貨物充牣回平煤礦遠近暢銷各項盈餘未嘗歸公每年支收亦未嘗報戶
部等語臣等伏查輪船等項創辦之始或招集商股或借用官款或官督商辦或官商合辦原欲效西人
之長技收中國之利權迄今三四十年之久利不在國亦不盡在商誠如該大學士所奏所謂挽回利權
者安在應請 旨嚴飭辦理招商局輪船電綫事務大理寺少卿盛宣懷管理開平煤礦事務北洋大臣
裕祿迅將經管各項近年收支款目限二箇月內開具清單報明戶部備核並酌定餘利歸公章程專案
奏明嗣後按年提存候撥至鐵路一項津榆控制山海商貨無多蘆漢及關東一帶甫經勘辦其餘九路
正在議訂合同尙未興修惟京津一路 轅轂之下萬方輻輳所收運費較多然綜計該路起訖止得二
百四十里進款祇有此數亦尙有借撥之公私各款應在餘利項下先儘提還一時尙難計及歸公確數
應俟蘆漢幹路告成綺交脈注泉貨流通方可望大收實效至鐵路礦務兩項餘利歸公章程業經路礦

總局酌議奏准通行應飭一律照辦其餘未盡事宜仍由該局悉心察核隨時奏明辦理此外尚有漠河金礦得金最旺歸公數目亦最核實惟近來收數漸不如前誠恐江湖日下應請 飭下北洋大臣督飭承辦之員認真整頓務令提充餉項一款歲有加增勿令已成之局日就減削致窒利源又聞直隸近辦遷安礦務金苗極旺漠河之後此爲繼起並令裕祿查明實在情形妥定充餉章程迅速奏辦內閣學士準其請多開鐵路以出礦產自是就時勢以立言惟招集華股借用洋債兩端均未可以咄嗟立辦即現在議修之枝幹各路已苦力不能兼勉原擴充無非多借洋款萬一未能按限籌還則路礦皆非我有此中機括不能不預之於先應俟肅漢幹路告成體察情形實爲大利之所在再議逐漸推廣方爲穩著光祿寺卿袁甲三專論整頓釐金腦舉辦法六條並指核歷年釐金盛衰比較大數羅羅清疏所請慎用賢員綜核比較並斟酌各省物產衰旺釐定委員司巡參罰均屬扼要之論其外銷款項諸准列款報部則不獨釐金一項宜然各省自督撫提鎮以下文武各員無非爲民而設凡地方應辦之事無一不責之於官卽無一不取之於民特是 國家定制稽徵既有常經開支必循成例倘與例不合卽不能報部雖報部亦必不准銷此外銷名目所由來非盡侵漁入己也揆之情理既係地方之用自應作正開銷應懇 特恩准其臚列款項和盤託出開單請銷部臣不得掣肘如是則疆臣得以實用實銷有可信之簿書始有

可居之數目如果有事理不合仍可詳加駁詰酌予刪除但不必拘泥例章削趾適履耳其酌設坐賣落地捐一條與貽穀所陳包辦之法互有出入遵查坐賣落地捐歸商按月包繳各省固有行之者至水陸衝途分設局卡抽收入境出境釐金此則斷非商力所能及或仿胡林翼治鄂成法理財參用士人凡有水陸總卡官紳並委尙屬可行應請 飭下戶部將該京卿等原奏摘鈔咨行各省由各將軍督撫體察地方情形酌量辦理該京卿保薦程德洛等九員據稱以治稅釐必有起色應准該督撫等各就所知分別委任奉調畀以事權用徵實效內閣侍讀學士高燾曾奏海關抽稅磅價亟宜核實據稱從前訂約以關平銀三兩作一金磅折算今則磅價增至一倍有餘而中國不與計較暗中受虧不知幾萬萬等語通商以來磅價日漲一日迭經總理各國事務衙門飭令總稅務司擬具辦法向各國辯論而彼族輒抵制多方不肯就範然此係洋稅應讓之事終不能置之不問應請 飭下總理各國事務王大臣督同總稅務司赫德仍當通籌妥議力爭婉商期於必得誠有如該學士所稱籌餉大宗無逾於此者也至翰林院侍讀學士貽穀所陳各省派解防費之法與光祿寺少卿張仲忻奏請就稅釐課三項派定各省每年報解餉項若干之法用意相同惟貽穀請大省派解三百萬兩或二百萬兩中省小省以次遞降張仲忻請按照省分大小酌定數目多則二百萬兩至少亦五六十萬兩際此時艱餉絀各該督撫同一受 恩深

重具有天良讀此次裁汰陋規剔除中飽之諭旨而仍漠然無動於中者必非人情惟陋規中飽誠難決其必無貴以核實裁除認真釐剔該督撫其有奚辭若不問其所由來而謂數百萬之鉅款不難取懷而予且猶有盈餘似亦尙非確論即使假以事權於關稅釐金鹽課三項准其變通辦理恐政體之所傷實多而民氣亦鬱然不靖矣此等未敢輕於議行者也至籌餉原以專備練兵責備嚴則無可諉卸功罪明則無故苟安該少卿所稱各省戰守事宜應責成該將軍督撫自籌其餉自練其兵卽以自守其地係爲勸懲敷衍起見伏以餉項如何酌增兵制應歸劃一已蒙 頒諭各省詳定章程剴期舉辦應通飭各疆臣先事經營自爲固圉之計不准空言搪塞覆轍了事以上數端諸臣各有見地至謂理財以整飭吏治爲根本尤屬探源之論臣等伏見近年以來 詔書屢下於用人理財兩事 訓誡諄諄尤以勸求民隱爲 聖意之所專注比因練兵購械庫款不支不得已 中命廷臣集議籌餉正在剔除中飽裁革陋規絕無加取於民之意普天率土欽感同深各該將軍督撫皆當仰體 聖慈覈事求是以期共濟時艱倘仍有瞻徇市恩及敷衍塞責甚至虐取於民者辜負 國恩莫此爲甚應請立予嚴懲重治其罪聖明在上執兩用中必無敢自外生成者也臣等區區愚忱伏候 採擇施行 上諭前因各省關稅釐金鹽課積弊太深亟宜力籌整頓特諭大學士軍機大臣六部九卿會議具奏昨據諸臣歷陳近來經徵

各員種種侵欺幾於積重難返因詳籌裁汰陋規剔除中飽之法集議奏聞並據大學士徐桐內閣學士
準良光祿寺卿袁昶內閣侍讀學士高燾會翰林院侍講學士貽穀光祿寺少卿張仲忻單銜具奏各抒
所見或於會議之外的加推廣或仍就稅釐等項另籌辦法復經諭令軍機大臣大學士六部九卿妥議
具奏茲據軍機大臣等逐條議覆請旨施行綜核諸臣兩次會議所奏尙屬切實可行近來時事多艱餉
需不繼中外諸臣正宜殫竭血誠力圖報稱乃各省經徵關稅釐金鹽課之員積習相沿工於舞弊止知
有身家不知有君國各該將軍督撫亦或瞻徇情面意存隱飾坐視國家之急漠然無所動於中似此情
形言之殊堪痛恨江南地大物博業經特派剛毅前往將關稅釐金鹽課等項實力整頓諒該大臣必能
不避嫌怨會商該督撫遵旨認真辦理其各省將軍督撫著各就地方情形切實考核責成司道監督
及局員等將現在收數無論爲公爲私凡取諸商民者一併和盤託出一律澈底清查卽由該管將軍督
撫詳細旬稽悉心綜核究竟裁去陋規中飽之數若干酌量提歸公用之數若干勒限三箇月擬定章程
專摺奏報此外尚有雖非陋規中飽而利不在國亦不盡在商如徐桐所奏輪船招商局電報局及開平
礦務局近年獲利不貲而盈餘利息如何酌提歸公未經議及是徒有收回利權之名並無裨益國家之
實著責成辦理輪船電報事務大理寺少卿盛宣懷督飭在事官商人等迅將經管各項近年收支數目

亦限三箇月分晰開具清單酌定餘利歸公章程專案奏明請旨定奪並著北洋大臣裕祿將開平礦務局查明實在情形督飭承辦之員一體辦理漠河金礦提充餉項成案最爲核實惟近來收數日絀應飭認真整頓直隸新開遷安金礦收效甚速其充餉章程亦應一體議及至鐵路開辦未久祇津蘆一路獲利較厚然道里太短亦尚須提還公私借款餘或正在興修或議定尚未開辦須俟蘆漢鐵路告成體察情形實爲大利之所在再議推廣良所請擴充鐵路之處目前暫毋庸議袁昶奏整頓聚金辦法六條不無可採其外銷款項准亦報部以昭核實所有各省內外總分各局卡應如何因地制宜官紳並委著該將軍督撫體察情形酌量辦理該京卿所保道員程侯洛等員並著各該省各就所知分別奏調委用貽穀請將各省釐金歸紳商包辦惟坐賣落地捐尙屬可行至於入境出境總卡則非紳商之力所能及未可一概而論其所陳分省派解防費與張仲忻請就稅釐課三項派定各省每年增解餉餉之議大略相同我朝撫有方夏二百餘年列聖厚澤深仁涵濡於百姓者至深且久凡在食毛踐土之倫好義急公成爲風俗刻各將軍督撫手握疆符受恩深重值此時艱餉絀得一紙詔書明定成數責令歲解若干用以副公忠體國之義何患不令出惟行惟國家深維民爲邦本一絲一粟無非民力所成遇有急需朝廷或之疆吏疆吏責之有司有司不取之百姓將於何取之曠茲黎庶方軫念之不服更何忍以責疆吏

者重累我民是派解一事斷不可行諸臣所議深得朝廷體恤民艱之意至於釐剔關稅釐金鹽課諸弊酌定招商電報礦務各局餘利歸公成數各該將軍督撫暨督辦之員尤當開誠布公剴切開導俾在事大小各員及紳商人等咸曉然於朝廷實事求是並非竭澤而漁誠能激發天良將各項所得盈餘逐一據實開報朝廷體察下情不但追咎既往並當酌盈劑虛留其有餘不使辦公竭蹶以上各節但能辦理得宜均可集成鉅款仍聽候特簡大員覆加查核倘承辦關稅釐金鹽課各員開報不實定將隱匿之數計贓科罪如該管將軍督撫意存瞻顧敷衍塞責亦必立予嚴懲決不寬貸招商電報等局督辦之員實有攸歸倘藉口餘利無多並不竭誠報効或任聽員紳商賈壟斷分肥一經查出在事各員均不得辭其咎也近年以來迭諭籌議餉項誠以練兵籌餉事本相因張仲忻請飭各省將軍督撫自籌其餉自練其兵卽以自守其地係爲專責成絕諉卸起見著該將軍督撫各就所轄地方通盤籌畫妥爲布置不准空言搪塞其餘所議各節均著依議行所有兩次會議摺二片並徐桐等摺片單十件著該衙門分別摘鈔咨行各該省一體查照辦理將此通諭知之○以綽哈布爲成都將軍錫振爲寧夏將軍○辛巳上御勤政殿德使臣克林德覲見○諭載瀾敬陳管見一摺 陵寢樹株風水攸關理應加意慎重乃近來樹株迭被蟲災該管各員平日漫不經心概可想見著自此次搜捕淨盡後如有樹株生蟲之處該

管官弁能於三月內搜捕淨盡者免其置議仍不得率行請獎若並不卽時搜捕致令成災卽將該管官弁分別議處倘意存規避匿災不報除將各該員弁從嚴懲處外並將該管大臣予以應得處分○諭毓賢奏劣紳私立鄉團據實糾參一摺山東諸城縣在籍降補中允臧濟臣前聊城縣教諭臧俞臣私立會團名目自稱團長倚勢作威糾眾挾制官長強索民捐積穀錢產其團眾復勒索多端恃眾滋鬧以致民心惶惑實屬劣跡昭著未便姑容降補中允臧濟臣前聊城縣教諭臧俞臣均著卽行革職交地方官嚴加管束以示懲儆○癸未松椿奏近來疊奉 諭旨飭令振興商務惟商務之流通視乎銀錢之周轉清河爲南北要衝戶鮮殷實間有開設錢鋪者資本不厚每多空虛且不免據價居奇兌換之時易受虧折而近年銀根甚緊制錢缺少每多倒閉以致壅塞不能流通殊於軍民大有窒礙查同治元年前任漕督吳棠光緒七年前調任漕臣黎培敬曾經設立通源官錢局有案現查地方情形亦亟應補偏救弊奴才仍在於清河城內設立官錢局的摺款項議定章程派員選董黃成經理名曰同仁源採辦現錢以平市價行使板票以利輕齎似於軍民市面均有裨益下部知之○甲申諭軍機大臣等奉天鹽釐雖經屢加整頓近聞商販偷漏以及委員收多報少之弊仍不能免現當籌餉孔亟之時亟應嚴加整頓著增祺督飭印委各員實力認真稽察毋任利歸中飽夾私偷漏并能否再行加價體察地方情形妥定章程詳議

具奏將此諭令知之○丙戌徐士佳奏懲治官員之例重者至於革職所以昭炯戒也乃由今觀之革職可以儆常人而未足以懲貪墨故朝廷以爲赫然怒之者此輩直若怡然安之誠以彼方借入官爲謀利之階但使蓄積饒多則已償所願其初念本未嘗以一官之去留爲榮辱所以常人革職則一朝貧賤誠有不堪言狀者貪吏則滿載而歸依然富戶求田問舍其樂或反過於有官卽或年力方強官情尙熱則挾其多金以結交勢要而河工洋務軍營各優差求無不得不數年而開復原官矣又不數年而保升過班矣夫貪吏而偶然敗露者十人之一二耳而此一二人者其究竟仍未嘗有所損也良由所惡者厚而勢處於常伸故進退升沈無往不可以自得而法令幾於無權無怪乎朝廷日嚴懲貪之令而貪吏仍日見其多也擬請嗣後遇有懲辦貪吏之案於處分之外復量其資財分別罰繳職款以充軍餉庶法令有權而貪吏稍知斂跡夫金作贖刑著於經訓況當財用因乏之時懲款匪易若將貪吏悖入之資充整軍經武之用無傷政體且亦得情法之平未始非籌款之一策也上諭御史徐士佳奏懲辦貪吏請於處分之外分別罰繳職款等語國家定制懲治貪墨條例最嚴若如該御史所奏近來官場以官爲謀利之階剝削脂膏取民肥己追經發覺參革無不滿載而歸似此情形殊堪痛恨著各該督撫隨時考核如有此等不肖官員於例定處分外分別罰繳職款悉充軍餉以肅法紀而儆貪婪○諭增祺等奏

昭陵明樓座臺應行修理一摺著欽天監於本年六月內選擇吉期行知增祺等遵照歸於明樓工程內一併敬謹興修○崧蕃王毓藻唐炯奏臣等於光緒二十五年三月十五日承准軍機大臣字寄光緒二十五年二月十四日奉 上諭前因京城制錢短少曾經諭令沿江沿海及近畿省分於應解部庫款項搭解一成制錢原則逐漸流通便民利用因思雲貴每年解京銅鉛本備鼓鑄之用若令改鑄制錢分批運解既省京局鼓鑄之煩於運腳費用當亦無甚出入著崧蕃王毓藻唐炯體察情形或全行鑄錢解京或分作數成以若干成鼓鑄制錢分起運解以資拖注務即迅速籌議奏明辦理等因欽此臣等查鼓鑄錢文弊竇滋多動招物議辦理極不容易但值京師制錢異常短絀臣等何敢畏難稍存推諉當經會同籌議鑄錢運京應需雜用雖不無少增而京局卻省鑄費折耗誠如 諭旨無甚出入然京局二百年來定制未可遽停擬請每年起解銅一百萬斤備供京局鼓鑄外以五十萬留滇試辦鑄錢分批起解如廠銅幣旺再行奏明酌量加鑄惟滇省停鑄多年一切無異創始現趕緊勻撥銅鉛修葺房屋招募工匠製造器具布置略有頭緒卽行開鑄鼓鑄不敢遲延再貴州前解鉛斤多係山滇採辦以後鑄錢之事既由滇省舉辦應卽由臣炯一手經理自行奏銷以一事權謹將籌議試辦章程開單恭呈 御覽敕部議覆施行其有未盡事宜臣等隨時咨部核辦下部議奏○丁亥許應騷奏福甯府三都澳通商經臣專摺奏

明於三月二十九日開辦並飭委鑲紅旗協領明玉會同稅務司前往開闢查此時商賈尚未暢行稅務較簡應暫由東冲口委員就近兼管以節糜費俟將來關徵日旺再行添設俾專責成其餘應辦各事宜統容臣定章程次第舉辦再稅務司建造洋關公所除地價外估計工料約需關平銀三萬五千兩請在洋稅項下動支合併陳明下所司知之○竊近因各省吏治疲玩已久迭諭各該督撫慎選牧令認真整頓惟是地方民事雖視乎州縣之得人而道府等皆有監督表率之責乃近來爲道府者往往意圖安佚於刑名錢穀事件循例中轉並不考核一切責之州縣漠然無所可否殊非朝廷設官分職大小相維之意嗣後道府等官於所屬地方利弊務當悉心考察督率州縣事事認真辦理各州縣有貪黷不職之員著卽破除情面據實稟揭倘該道府等不能整躬率屬甚至徇庇屬吏扶同欺飾卽著該督撫隨時一體參劾以肅吏治○辛卯諭軍機大臣等奉大鹽運雖經屢加整頓近聞商販偷漏以及委員收多報少之弊仍不能免現當籌餉孔亟之時亟應嚴加整頓著增派督飭卽委各員實力認真稽察毋任利歸中飽夾私偷漏井能否再行加徵體察地方情形妥定章程詳議具奏將此諭令知之○壬辰馬蘭鎮總兵果勒敏以病免○癸巳以奎順爲馬蘭鎮總兵○諭止藍旗滿洲都統榮祿等奏兵丁應領甲米請旨遵行一摺據稱本月初六日該旗接准戶部來文兵丁應領本年六月分大甲木色稷米七千四百十三石

署當經該都統等率同參佐等員連日赴倉領出新稞米四千餘石分散各佐領下兵丁領訖十七日戊刻忽接倉場衙門文稱該旗應領稞米每石應搭放陳米三升其時米數領已過半始接新陳搭放之文前後米色不符必至眾口紛紜難辦理等語此項甲米該旗所接戶部來文並未聲明按七新三陳搭放是否該部漏未聲敘抑係值年旗轉傳錯誤著各該衙門詳細查明查取承辦司員職名照例交部議處至該旗應領米數業經領出新稞米四千餘石分散各佐領下兵丁其餘自應一律辦理所有正藍旗滿洲應行續領甲米三千餘石著倉場衙門一律開放新稞米毋令相形見絀此次係因該旗接到倉場衙門搭放咨文已經領米散放過半之後未便令後領者事出兩歧是以權宜辦理不得援以爲例嗣後應領米石仍著遵照奏定章程分別新陳支搭開放並山戶部倉場衙門先期詳細知照俾免臨時舛錯

○甲午欽奉 慈禧端佑康頤昭豫莊誠壽恭欽獻崇熙皇太后懿旨劉坤一奏病體未痊懇請開缺一摺劉坤一老成宿練久任疆圉辦事具有條理著賞假一月毋庸開缺並賞給人參四兩俾資調理○予故福建臺灣巡撫劉銘傳於原籍建祠列入祀典○乙未以楊金龍爲江南福山鎮總兵○丙申諭廣西提督蘇元春喀什噶爾提督張俊均著加恩在紫禁城內騎馬○戊戌壽蔭等奏承准軍機大臣字寄光緒二十五年正月十二日欽奉 上諭練兵爲當今要務各省駐防生齒日繁閒散中不乏精壯之士著

該將軍等各就本處情形挑選若干教練成營以資捍衛所需餉項應與該省督撫藩司妥籌協撥奏明辦理等因欽此當經臣鍾麟臣傅霖附片奏明駐防旗兵本挑練洋操一千七百餘人餉需由善後局支給以後或增或緩俟臣壽蔭抵任再行會商酌辦欽奉 硃批著候壽蔭到任後會同認真訓練欽此欽遵在案臣壽蔭於二月二十一日抵任後分次校閱洋操旗兵步伐整齊鎗礮有準訓練均屬得法此外閒散旗丁年力精壯者頗不乏人惟粵省庫儲既乏捐借但窮情形迥非昔比舊存及新募各軍餉力已虞不繼勢難多練旗兵臣等會商原練之千數百人洋操具有規模尚未明定營制擬由臣壽蔭從閒散中悉心挑選湊足二千人編為四營悉照洋操認真教練慎選將材為之統率應需餉項由善後局源源撥濟以資飽騰而備捍禦將來餉源稍裕再行添練以成勁旅得 旨覽奏已悉即著該將軍認真訓練以資保衛所需餉項並著該督源源撥濟毋任匱乏○已亥諭軍機大臣等有人奏鹽務劣紳纏訟請飭查辦一摺據稱兩淮丁溪正場有候選道嚴開第勾串合謀魚肉商人嗾使舉人丁崇業誣指恆生錦剋扣桶價在總督運司投遞私函招搖誣訟並有串通督署門丁朦批苛罰情事請旨飭查等語著剛毅確切查明秉公訊辦以儆刁風而安商業原摺著鈔給閱看將此諭令知之○諭軍機大臣等有人奏廣東候補知府王存善盤踞賭局包餉欠餉中飽甚鉅其收受陋規勒罰商民均有確據請飭嚴查等語該員

前次被參各款曾經諭令查辦即著歸入前案秉公確查據實具奏毋稍徇隱另片奏廣東營務廢弛張琮募勇謀爲統帶在校場聽選之始鎗斃土人以致罷市迫奪錦官充副將委署南韶連遊擊經部查出咨拿潛逃未獲總兵曾維成均係賄買補署上下欺朦匪徒混跡又片奏候補同知潘燦倚勢招搖各等語均著該撫一併確切查明覆奏原摺一件片二件均著鈔給閱看將此諭令知之○路礦總局奏華洋各商會同集股設立公司在 國家一視同仁准其開辦之本意原欲令該商獲均沾之利非欲令各該商據獨擅之利今請辦礦務之華洋各商因章程准公司勘定產礦處動輒混指某省府分若干縣若干並不確指某縣某處計明段落里數是徒使奸商串通影射壟斷把持轉致公正妥實紳商退縮向隅無以自效殊與准辦之本意大相刺謬應明示限制除已經批准之案仍照合同辦理外嗣後各該商請辦礦地只准各指定某縣之一處不准兼指數處及混指全府全縣以杜壟斷而均利益云云前次定章華洋合辦一切樞柄操自華商以歸自主惟內載已集華股十分之三即准招集洋股開辦雖係爲廣招徠開風氣起見然股本華三洋七輕重既已不倫事權即恐旁落易開喧賓奪主之漸應將原章釐正除已經批准之案不計外嗣後華洋股本均令各居其半方准開辦以免偏倚仍由華商出爲領辦若洋商不由華商領辦徑行請辦者概不准行又查前次定章各省紳商呈請辦礦該地方官察其無

總局核奪不得率行批准其在總局遞呈者亦咨查原省然後批准以杜朦混招搖等
弊是定章不意凡山東商呈辦礦務必俟查明批准後始招集洋股合夥方免弊端若未經遞呈及遞呈
尚未批准先與洋商合夥指辦某處礦務迨經行查實多窒礙難行徒令該商空費詣勘等費用不特無
以示體卹且朦混招搖之弊仍未能除亦應將原章申明增定嗣後華商應辦礦務必俟查無窒礙業經
批准始准招集洋股訂立合同再將該合同呈送聽候核准開辦若先行合夥而後呈請者概行駁斥又
查前次定章承辦者自批准之日起至多不得逾六箇月即呈報開工倘遷延不辦所有批准之案作廢
又內載如有事故不在此例然因此而託故遷延將徒有開辦之名並無開辦之實今應明與定限自批
准之日起統以十箇月為期無論有無事故若逾期不辦即將批准之案查銷由地方官查明另招他商
承辦該商不得爭論餘仍照前次奏定章程辦理其議開在先各礦仍照舊核辦以免紛擾得 旨如所
議行○剛毅等奏自強之道首在練兵尤以籌餉為要務然而今之餉源亦幾竭矣無論前明之加練餉
稅政固不足道即言利之臣或搜求瑣屑或創闢新奇均屬無關本計奴才至愚極陋竊意欲下不病民
生上不失政體全在杜中飽節糜費奉 國家原有自然之利仍以還之司農而已此次奉 命南來籌
餉日兢兢以不病民生不失政體為主計在籌所籌各項得銀六十一萬餘兩在蘇清賦約得銀米各二

十萬合銀約六十萬兩兩共銀約一百二十萬兩均經具疏陳明在案而其所以取之者釐金也關稅鹽務盈餘也清查提荒也裁併局所也皆不外乎杜中飽節糜費雖區區之數何裨度支然就各行省之大均此辦理爲數實已不貲請得而詳陳之釐金弊竇多端久遞 聖明洞鑒顧其弊尤莫重於中飽外省目道金爲優差辦捐之員無不捆載而歸有捐升過班者有擁護歸作富家翁者今之金陵歲增比較二十萬兩非能額外苛取商民也不過分委員之貪婪而已聞鹽務侵蝕之弊金陵之外浙皖最甚他省亦無不然如令各加比較不難歲得數百萬兩此可籌者一也關道乃著名美缺所入之鹽萬衆皆知其盈餘之可提無論矣所徵稅項報解亦多不實不盡各關又有外銷之款糜費尤鉅卽如江海一關歲支南洋隨員及掛名洋務薪水一項耗銀三萬五千兩是各關冗費之宜裁節俱可類推如津海關東海關浙海關缺分尤優或予一律酌提並將稅項加意整頓亦可湊入鉅資此可籌者又其一也兩淮鹽務素稱饒沃鄂皖湘西四岸督銷歲贏數萬少亦萬金其盈餘之可提不必言已而鹽綱積壓引銷疲滯虧欠課餉不知凡幾聞浙鹽壓綱尤甚此外各省亦多未能年清論者動藉口於廢岸多未規復私販尙形充斥竊計肅清壓綱以來逾三十年滋生丁口不少鹽爲日用必需何以引銷仍未暢旺誠令有鹽務省分疏通壓綱籌增引數並議酌提盈餘於餉需殊有裨益此可籌者又其一也各省兵燹之後田多荒蕪其中

捏熟作荒實屬不少卽如浙西杭嘉湖三府短徵銀米甚鉅該處匿報之弊一由於官吏因緣爲奸改出糧爲地稅避重就輕一由於湘楚客民佔地墾種喧賓奪主去來無定抗不升科至紳戶包庇抗欠迥不若蘇省之甚誠能實力清查嚴禁隱匿正供丁漕不難漸復原額此可籌者又其一也局所者縣也所以位置冗員者也屢奉 明詔飭令裁併然外省局所名目林立其可裁撤歸併尚多卽如既有善後局又有籌防支應等局既有水利局又有塘工隄工等局政出多門殊犯疊牀架屋之病虛糜餉項不知撙節誠應破除情面認真裁併省一分之浮費卽多得一分之正項此可籌者又其一也以上各條總以杜中飽節糜費爲本奴才平時每如此立論區區一得之思但期下無病夫民生上無失夫政體而已可否請旨飭下各省督撫就奴才所陳各條認真舉辦似於籌餉之道尙爲確有把握不滋流弊惟幣藏日絀籌畫良難並請 飭下戶部權衡緩急慎重放歛庶有的餉以濟練軍之用而自強之圖基此矣 上諭剛毅等奏整頓幣捐及酌提關稅鹽務盈餘並裁併局所一摺前因籌備餉需亟應剔除弊竇特派剛毅前往該省會同劉坤一等奏稱江南各項關支近年迭次裁減爲數已逾百萬現復悉心綜核添捐關稅鹽務各項每年再行加提盈餘並裁併各局所節省經費確有成數等語國家慎重度支自以嚴杜中飽撙節糜費爲理財要義然使搜括無遺亦恐辦公竭蹶該大臣等所籌尙屬周詳該司道等共體時艱

認提公款於餉需不無裨益卽著照所議辦理所有此次籌出各款均係取之官吏並未取之商民倘有藉此爲由另行設法取償以致格外累商病民者該督等務當確實查明嚴行參辦用副朝廷興利除弊之至意○庚子諭軍機大臣等有人奏敬陳管見以裕利源一摺據稱輪船招商局電報局督辦之員盤踞把持積弊多端請派大員澈底詳查等語招商電報兩局前經明降諭旨飭令盛宣懷督飭在案官商人等迅將經營各項近年收支數目限三箇月分晰開具清單酌定餘利歸公章程專案奏報並會同酌擬飭令督同盛宣懷一併澈查原以輪船招商局務係官督商辦其各分局各輪船如有弊竇應由該局隨時自行整頓也茲據剛毅奏由甯起程赴蘇查核招商電報兩局款項著卽懷遵前旨督飭盛宣懷迅將酌提餘利歸公章程擬定成數奏明辦理當此時局孔艱諒該大臣必能不避嫌怨實事求是萬不致任意聽在事各員多方掩飾置公家利權於不顧也原摺著鈔給閱看將此諭令知之○裕祿奏北洋各項火藥向於離津城四十里外緊靠北運河之浦口地方建立藥庫分別存儲庫房附近另有小藥庫五間收存機器局造成棉藥並軍械局北塘防營寄存棉藥及未裝彈子之無煙藥銅壳等項由機器局派委千總賈壽外委楊玉成帶領兵丁駐庫看管突於五月十七日夜間小藥庫內所有棉藥忽然轟發該弁兵等卽喚集村民趕緊撲救幸棉藥有性無質一味上衝不致橫發大藥庫未被牽連報經機器局總

辦道員王仁寶馳往察看小藥庫四面壁牆未動僅將房頂揭去詳究失事之由因棉藥係外洋強水製成性最猛烈存儲日久每致回酸近日天時過於亢旱風乾日燥以致觸動藥性自行轟發屢訊兵役及附近居民人等實無別項弊端計庫存棉藥十萬餘磅及未裝彈子之無煙藥銅亮七百餘兩均被轟毀此外各項藥庫查無損失附近村莊亦無損傷房屋人口情事已將看守兵役分別責革另行派員前往接管等情稟報前來奴才覆查此次浦口小藥庫所儲棉藥突然轟發雖據查係因人乾物燥強水回酸所致事出意外惟千總賈壽外委楊玉成均係專司典守之人自應格外小心照管乃事前疏於防範實屬咎有應得應請旨將該千總等一併卽行革職以示懲儆總辦機器局直隸候補道王仁寶向駐天津局遠隔數十里雖無監守之職而事屬統轄未能預為籌備亦難辭咎應請旨交部議處得旨賈壽楊玉成均著卽行革職王仁寶著交部議處